

摘藻堂四庫全書薈要

史部

欽定四庫全書薈要卷八千六百四十七

史部

十國春秋卷八十一

檢討吳任臣撰

吳越五

忠懿王世家上

忠懿王名俶字文德初名弘俶文穆王第九子也寶正四年八月二十四日生於功臣堂母曰吳氏天福四年十二月承制除內牙諸軍指揮使檢校司空忠獻王時累授特進檢校太尉開運四年春三月庚寅出鎮台州

忠遜王立徵弘倣同參相府事會僧德韶者亦勸弘倣
急歸不然將不利秋九月甲戌遂發台州是日大風東
南有雲如樓閣之象識者異之冬十月至國城居南邸
未幾有胡進思之變進思乃召諸大校及軍庶迎弘倣
嗣位弘倣見府僚將校于元帥府之外簾謙讓者三諸
將士皆拜手言太尉素有德望俯伏稱賀即以鎮海
鎮東等軍節度使檢校太尉兼侍中蒞事元帥府南序

時十二月庚戌日也

是時湖州民朱神佐以重價購紫
鳶獻瑞中道而鳶殞國人嘲之曰

瑞半

乾祐元年春正月漢大赦改元乙卯弘俶即王位于天
寵堂赦境內租稅班賚有差以弟弘億為丞相自前年
季冬浹于正旦陰晦彌月是日雲物澄霽人情大悅壬
戌遷故王弘侑于衣錦軍丙子漢主殂少主承祐即位
二月辛卯王親祀五廟乙未內牙指揮使何承訓伏誅
初承訓預胡進思之事至是復請誅進思王惡其反覆
因有是命三月漢遣中書舍人張誼來歸忠獻王之賵

是時胡進思屢請殺廢王弘侗以絕後患王不許已又
矯王命令都頭薛溫害之溫拒曰受命之日未聞此言
不敢妄發由是進思憂懼日積丙寅進思死夏四月大
閱馬步兵六月朔日有食之冬十一月下令每歲租賦
逋者悉蠲之仍歲著為令是歲王以漢使張誼輕肆奏
其過于朝及其副使馬承翰

乾祐二年春二月匡武都連名輒舉求職王命斬狀首
二人坐黜者二十餘人餘宥之三月漢勅授王東南面

兵馬都元帥鎮海鎮東等軍節度使浙江東西等道管
內觀察處置兼兩浙鹽鐵制置發運等使開府儀同三
司檢校太師中書令杭州越州大都督上柱國吳越國
王食邑一萬戶實封一千戶仍賜匡聖廣運同德保定
功臣夏四月太白晝見乙亥城西上清宮災五月內牙
指揮使斜滔以罪黜于處州滔胡進思之黨也秋七月
王命弟弘億為明州刺史冬十月漢遣散騎常侍張煦
等持節備禮冊王為吳越國王仍賜玉冊金印法物等

冊曰惟乾祐二年歲次乙酉十月庚午朔十九日戊子

皇帝若曰我先帝順天致罰大拯黎元享萬靈於無主
解兆庶之倒懸較定世勲以吳越居右伊朕眇末虔奉
先訓嗣位之始即疇懋功前命為元帥按地圖授武節
東南之境得行征伐今冊為真王駕大輅執桓圭牛斗
之鄉盡荒土宇詢於有位僉曰克諧咨爾匡聖

宋史作
翊聖

廣運同德保定功臣東南面兵馬都元帥鎮海鎮東等
軍節度使浙江東西等道管內觀察處置兼兩浙鹽鐵

制置發運營田等使開府儀同三司檢校太師兼中書
令杭州越州大都督上柱國吳越國王食邑一萬戶實
封一千戶錢弘俶象緯炳靈公王襲慶橫江負海者三
千里開國承家者六十年而能望辰極以駿奔奉天朝
之師律充庭納貢則外府告盈下瀨宣威則前菲獻捷
忠信著於羣后禮讓行於一方故玄冕九章為王之服
昭其名也朱輪駟馬為王之馭昭其器也而又三吳百
越列土分疆有民人焉有社稷焉恢祖禰之令圖實典

禮之鉅著勸夫忠孝以御邦家今遣正議大夫守右散
騎常侍上柱國賜紫金魚袋張煦左補闕崔頌持節備
禮冊爾為吳越國王於戲品秩甚尊名數尤重肅廣庭
而備物練吉日以覃恩爾其正厥位事大以敬教民以
順馭衆以恩神其福之禮曰惟王建國諸侯所以守舊
邦書曰惟帝念功王者於是出好爵匡我堯緒永為漢
藩浙江如帶稽山如礪福祿無窮貽厥百世汝往欽哉
對揚我休命是月內牙指揮使諸溫以罪黜于温州十

一月甲寅王遣判官貢漢御衣犀帶金銀裝兵仗綾絹

茶香藥物祕色甌器鞍屐海味等物封龍泉縣神為匡

濟將軍

開寶中避宋太祖諱改康濟

是歲募民能墾荒田者勿取其

稅由是境內無弃田或請糾遺丁以增賦王杖之國門

又置營田卒數千人以淞江闢土而耕

一云吳越時開墾田土修理水

利米一石不過錢數十文按宋高宗時知揚州晁公武言吳越墾荒田而不加稅故無曠土此可知穀賤之由

○又按吳越每身錢三百六十是丁錢又最重矣其說未審是非

乾祐三年春二月甲申唐劍州刺史陳誨寇福州執我

守將馬光進等庚寅唐永安軍留後查文徽至福州知
威武軍吳程指揮使潘審燔令閩人詐降遂生擒文徽
及唐行軍判官楊文憲等三十餘人于城下斬馘萬計
陳誨等敗走是月甲午丞相昭化節度使同平章事鄖
國公杜建徽卒三月漢授王守尚書令增食邑二千戶
實封五百戶夏四月王以查文徽等獻于五廟丙午王
親享五廟六月漢授王兄東府安撫使弘儼知福州威
武軍事秋七月戊寅王命弟弘億為東府安撫使是月

唐歸馬光進等以易查文徽冬十月王遣文徽歸金陵
十一月二日王以誕日飯僧乙亥王貢漢謝恩綾絹二
萬八千疋銀器六千兩綿五萬兩茶三萬五千斤御衣
二襲通犀帶戲龍金帶各一圍

廣順元年春正月周主即位改元大赦三月周加王諸
道兵馬都元帥增食邑一千戶實封三百戶仍降尚書
冊禮夏四月王奉故王弘侂居東府繕園圃亭苑花卉
山石以娛之歲時供饋甚厚夏六月丙午武勝清海等

軍節度使王世父元懿卒以其子仁倣嗣是月王命復
 從兄前內外馬步都統軍使仁俊官爵是歲建空律寺
 捨舊苑為靈芝寺因芝生苑內故名

廣順二年春二月周授王天下兵馬元帥

救曰古之王者故邦經野

分職設官疇建殊庸懋昭大德我有重臣世膺王爵雖
 任一方之帥未超極品之榮漢法非劉不王唐制元帥
 為重茲惟大任寧授非人用錫名藩永扶昌運咨爾檢
 校太師守尚書令上柱國吳越國王錢弘倣乾坤間氣
 海嶽孕靈為民物之網維實朝廷之藩屏承家保國奕
 世美堂構之賢治亂持危四方推英豪之主梯航時登
 乎丹陛兵草靡及乎蒼生才足以尊主而庇民德足以
 移風而易俗肆歸建極不替忱誠有齊桓尊周之心而

忠義或踰乎齊有晉悼駕楚之畧而功名不忝乎晉建
之都督則百辟允諧使之元戎則三軍用命表海受一
方之寄真王啟萬戶之封匪爾令名曷兼衆職爾其不
墜善始永圖令終承我履言毋忝厥位可特授天下兵
馬都元帥餘如故按備史載廣順二年二月周授王天
下兵馬元帥顯德元年七月授天下兵馬都元帥宋史
亦云世宗即位授天下兵馬都元帥而此敕在廣順增
二年三月一日授王為天下兵馬都元帥中必有誤

食邑二千戶實封五百戶改賜推誠保德安邦致理

宋史

作致治

忠正功臣夏四月戊戌朔日有食之王改衢州刺

史叔元瓚知福州威勝軍事弟弘偓為衢州刺史六月
乙未王妣吳越國順德太夫人吳氏薨秋八月丁酉葬

恭懿夫人于國城慈雲嶺之西原九月甲寅朔丞相裴
堅卒以台州刺史吳延福同參相府事是時國內禁酒

宋人陳止齋曰國初諸路未
盡禁酒吳越之禁自錢氏始

廣順三年春二月湖州所隸建州降卒鄭懷嵩等十一
人以刺史散香于資福寺遂率其黨二百餘人作亂即
日盡誅之三月周授王起復鎮東大將軍左金吾衛上
將軍員外置同正員王以兄弘儼為温州刺史夏四月
建報恩元教寺于城北薦王妣也王親閱內外諸軍非

驍勇者咸停放之冬十月大閱馬步軍艘艚于碧波亭十一月命弟弘仰為台州刺史是歲東陽有大象自南方來陷陂湖而獲之境內大旱邊民有鬻男女者命出粟帛贖之歸其父母仍令所在開倉賑卹

顯德元年春正月丙子朔周主祀園丘改元是月周主殂晉王即位夏五月辛巳王命鑄恭懿太夫人銅容二致于奉國金地二尼寺秋七月丁丑周遣使加授王天下兵馬都元帥賜號崇仁昭德宣忠保慶扶天翊亮功

臣仍賜金印冬十一月周命進奏使章思忠歸諭機密

事舟覆思忠溺焉是歲建慧日永明院迎僧道潛居之

顯德二年春二月朔日有食之三月周加王食邑一千

戶實封四百戶夏四月庚子王親祀五廟五月周詔寺

院非勅額者悉廢之檢杭州寺院存者凡四百八十秋

七月庚午有虹入天長樓

樓在內城之東

王避寢于思政堂九

月復居于天寵堂閏月丁酉王子惟濬生

即稱世子

冬十一

月周命司空李穀伐唐十二月王遣元帥府判官陳彥

禧入貢於周周諭我出兵會擊金陵

顯德三年春正月周主東征詔王以國兵分路進討是月南擊場門樓火二月周師入淮南唐靜海軍制置使姚彥洪率家屬軍士戶口等一萬餘人奔于我癸未王命丞相吳程前衢州刺史鮑修讓中直都指揮使羅晟攻常州癸巳遣都指揮使路彥銖侵宣州羅晟督水師次江陰以竝周師既而周遣殿直薛有光來宣諭仍賜沿身衣冠法物三月我師克常州生擒刺史趙仁澤偏

將諸承向重霸等一百餘人壬子唐右武將軍柴克宏
襲吳程于常州我兵大敗先是唐遣中書舍人喬匡舜
來使至是克宏募船以匿甲士聲言迎匡舜程曰兵交
使在其間殊不為備唐兵登岸徑薄我兵營會羅晟鮑
修讓與程福州有隙晟以此不力救且縱之趣程帳程
裨將邵可遷力戰子死馬前猶戰不顧程僅以身免死
者萬計程遁歸王怒悉奪其官乙卯路彥銖攻宣州不
克聞程敗亦引還是月王命從兄知中吳軍節度事文

奉為水陸應援諸軍都統使屯于本州備徵發夏五月
丙申福州兵與唐永安軍節度使陳誨戰于南臺江我
師敗績指揮使馬進姚章等被執未幾誨亦宵遁六月
王命從兄仁俊知彰武軍事

周廣順元年改
福州為彰武軍

秋九月癸

卯王親閱于龍山教場冬十一月丙辰王貢周白金五
千兩綾一萬疋又進天清節金花銀器一千五百兩是
歲始括境內民丁以益師旅王弟弘億手疏切諫乃止
顯德四年春正月始議鑄錢三月周師大敗唐人于壽

春夏四月周宣諭使薛有光航海歸于京師秋七月庚

子王命弟弘信為衢州刺史八月周遣諫議大夫尹日

就吏部郎中崔頌來使賜王生辰御服紅袍二副道由

登萊汎海入浙周主諭之曰朕此行決平江北卿等還

當陸來也冬十一月唐清源軍節度使留從效請修貢

于周附我以聞許之是時紫芝生于永嘉之西山

顯德五年春正月丁未前衢州刺史王弟弘偓卒二月

周主幸揚州丁卯遣殿直趙誨來宣諭仍出戰艦于瓜

步迎鑿鎮長風涉等處以圖濟江壬辰王進御衣犀帶
又進供軍稻米二十萬石仍命上直都指揮使邵可遷
路彥銖帥艦四百艘水師二萬以會周師江北諸州畧
平三月王不康丙午周遣翰林學士都承旨陶穀司天
監趙修已賜王羊馬素駝每歲班賜自此始也是月唐
主奉表于周盡獻江北地周師乃罷初金陵之將附周
也王亦飛書諭之既而附我以誠欵聞周主詔從之夏
四月辛酉城南火延於內城官府廬舍幾盡王出居都

城驛壬戌旦火將及鎮國倉王親率左右至瑞石山命酒祝之曰不穀不德天降之灾倉廩積儲實師旅之備也若盡焚之民命安仰乃令從官伐林木以絕其勢火

遂止

宋史云世宗聞之遣內侍賫詔恤問

是時被火燬者凡一萬七千餘

家王謂左右曰吾疾因灾而愈衆心頓安丁卯王命弟弘儀復為東府安撫使周遣天下都軍頭周廣來宣諭仍賜邵可遷以下及將士衣服有差是月王進周綾絹各二萬疋白金一萬兩謝賜國信五月辛巳朔日有食

之唐主景去帝號奉周正朔六月戊寅前台州刺史王弟弘仰卒秋閏七月癸丑遣使朝周貢白金五千兩絹二萬疋細衣段二千連八月貢周白金五千兩絹一萬疋賀車駕還京又進龍舟一艘天祿舟一艘皆飾以白金壬辰周命上閤門使曹彬賜王騎兵鋼甲步兵軍甲旗幟等物冬十月乙巳王遷于思政堂十二月進賀正錢一千貫絹一千疋于周是歲周師克靜江軍尹日就等由陸還

顯德六年春二月周主勅升湖州為宣德軍從王奏也
以王弟弘僊為節度使夏六月周主榮殂子梁王宗訓
立賜王崇仁昭德宣忠保慶扶天翊亮功臣

建隆元年春正月癸巳周殿前都點檢趙匡胤稱帝國
號宋大赦改元遣使來宣諭三月乙巳宋改郡縣犯御
名廟諱者王以名犯宋宣祖偏諱去弘以倣單行甲寅
大慶堂成堂廣大凡百間王舊邸也丙辰遣使貢御服
錦綺金帛賀宋即位夏四月宋授王天下兵馬大元帥

加食邑一千戶實封五百戶五月周昭義軍節度使李筠舉兵丁巳宋帝親征六月甲午宋勅加吳越國賢德夫人孫氏為賢德順睦一作穆夫人又授兩軍節度副使王世子惟濬金紫光祿大夫檢校太保充本軍節度使秋七月庚子潞州平宋遣通事舍人武懷節來宣諭九月周淮南節度使李重進舉兵宋帝自將東征王遣上直都指揮使孫承祐率師至潤州以應之庚申寧國軍節度使王舅吳延福等有罪並除名配外郡冬十一月

丁未揚州平宋遣通事舍人王繼筠丁德裕來宣諭仍
賜國信庚申宋復遣西上閭門副使武懷節來宣諭甲
子王命弟衢州刺史信入貢自宋革命王貢奉有加常
數竒器精繡皆製于官以充朝貢十二月王遷于功臣
堂是歲王直勅靈隱寺立石塔四

建隆二年春三月宋遣丁德裕送王弟信回仍賜馬二

百疋羊五百口橐駝二十頭

宋史作羊五千橐駝三十今從備史

秋七月

丁亥宋昭憲皇太后崩遣使來宣告自五月不雨至于

是月王命取龍湫于天台山以祈雨九月始權酤冬十二月王命弟信復為衢州刺史是時海舶獻沉香翁一具高尺餘剜鏤若鬼工王號為清門處士又高麗舶主王大世選沉水千斤疊為旖旎山象衡岳七十二峯王許以黃金五百兩竟不售

建隆三年春二月宋遣右殿直王著來宣諭仍賜國信是月王遣使聘于清源軍節度使留從效會從效卒子紹鎡夜燕我使統軍使陳洪進執紹鎡送于唐夏五月

婺衢睦三州民灾戊辰王遣使賑卹秋七月壬戌大風
拔木八月陳洪進推副使張漢思權知清源軍事九月
庚戌夜所在地震響如雷冬十月庚寅宋遣上殿直景
德倫授兩鎮節度使王世子惟濬為邕州建武軍節度
使庚子宋遣西上閤門副使武懷節至以張漢思不稟
朝命俾王責之王遣使往責漢思遂從命焉

乾德元年春正月王以白金萬兩犀牙各十株香藥十
五萬斤金銀真珠璫瑁器數百事貢宋三月朔日有食

之夏四月丁未張漢思為四門指揮使

一作副使

陳洪進所

幽洪進歸命于金陵已又附王請命于宋遂授洪進平

海軍節度使檢校太傅秋七月丁巳重建天寵堂壬申

大閱戰艦于西湖賜內外將校服帶有差冬十月甲申

獲巨魚於江壩長九丈六尺十一月甲子宋有事于南

郊改元大赦王命從子昱入貢宋遣引進使丁德裕來

宣諭仍加王食邑一千戶實封四百戶改賜承家保國

宣德守道忠貞

宋史作忠正

恭順功臣又加建武軍節度使

王世子惟濬檢校太尉十二月末孝明皇后崩遣使來
宣告是月命從子郁為秀州刺史

乾德二年春正月戊寅朔大雨震電二月戊申朔日有
食之三月宋制王落起復天下兵馬都元帥加食邑一
千戶實封四百戶夏四月重建城南寶塔寺奉武肅王
文穆王忠獻王銅容于內秋八月庚申王駕復天寵堂
謂丞相以下曰頃以寡德遂貽災釁曾未十年中外如
斯實宗廟之休公等之力然作之者勞吾不敢忘更賴

公以輔不逮丞相以下咸稱大慶冬十一月宋師伐蜀
王命親從都指揮使行軍司馬孫承祐等率師會焉是
歲建千光王寺

乾德三年春正月乙酉西川平二月乙丑王命從子台
州刺史昱入賀于宋秋七月有虎出于龍山凡傷數十
人捕之踰旬而獲八月癸卯重建寶塔寺于城北是月
宋遣通事舍人張延通來宣諭仍賜生辰禮物甲寅丞
相吳程卒冬十一月王以前知福州彰武軍事叔元瓚

為睦州刺史從子昱復為台州刺史是歲建天龍寺

奉鏡

清禪師居之

宋勅鑿杭州之虎頭巖虎頭巖者山頭突出如

虎首然望氣者云杭州有王氣故有是命

乾德四年春二月乙亥王兄宣德軍節度使吳興郡王

僖薨夏五月丙戌王從兄婺州刺史仁倂卒六月宋授

王子內牙都指揮使惟治為容州寧遠軍節度使金紫

光祿大夫檢校太保九月壬寅王避正寢于功臣堂以

計都入須女也癸卯知福州彰武軍事王兄儼卒冬十

一月甲寅王命弟信知婺州武勝軍事是歲王迎阿育
王舍利歸南塔寺奉之先是明州阿育山有靈鰻井至
是鑿井南廊鰻忽見焉

僧贊寧
有記

乾德五年春二月丁卯王除睦州刺史叔元瓚知福州
彰武軍事戊辰王弟奉國軍節度使億卒壬申宋勅祀
禹祠于東府置守陵五戶己卯王從兄温州刺史仁俊
卒三月五星聚奎是月王世子惟濬入貢而還賫宋所
賜吳越國賢德順睦夫人珠翠冠帔等夏四月王命子

寧遠軍節度使惟治兼判奉國軍事秋七月宋授王弟儀依前鎮東軍安撫使金紫光祿大夫檢校太保冬十月王遣元帥府掌書記黃彛簡入貢于宋是月宋遣使至賜王生辰禮物十一月辛酉大閱于教場仍宴將帥是歲都岳務文朗副貳陳紹珠等率安國縣南新寧善新登廣陵銅峴鄉衆乞以五鄉人戶別置一場就彼徵科輸送為便王是之命特置南鄉場入其賦建淨心院于北山

十國春秋卷八十一

欽定四庫全書薈要卷八千六百四十八

史部

十國春秋卷八十二

檢討吳任臣撰

吳越六

忠懿王世家下

開寶元年春三月乙酉丞相元德昭卒乙巳建奉先寺于城西薦文考也是月宋封王為吳越國王加食邑一

千戶實封一百戶

勅曰卿顯著事功已書簡冊雖將印

中正常用欽嘉今封卿為吳越國王加食邑一千戶實封一百戶見命使臣魚行冊禮故充詔示俾咸知恣

夏六月戊午蘇州長洲縣民王安妻產三子壬辰知福
州彰武軍事王叔元瑣卒是月宋遣使賜王生辰禮物
冬十月辛酉命世子建武軍節度兩軍副大使惟濬兩
浙行軍司馬孫承祐入貢于宋助郊祭也十一月宋南
郊大赦改元十二月己酉朔日有食之辛亥宋賜王誥
曰朕惟上天助祐四海晏清車書混一於華闕雨露滋
榮於稼穡幸歲時之大稔政庶務之小康順一陽而再
陟郊壇結三獻而恭陳告謝荷神心之昭格覃慶澤於

幽遐乃眷保臣方膺重寄表率恒高於華夏鎮臨久蒞
於列藩我有異恩持垂殊寵咨爾天下兵馬大元帥檢
校太師尚書令吳越國王錢俶爾既推誠而奉朕朕當
開懷而獎爾是用擇茲吉日降以殊恩錫吳越之兩藩
兼都督之名位命爾令子為予守臣授雙節于天朝所
以顯元帥之隆重效一方之職貢豈不表臣子之忠誠
井田更易於初封品秩彌光於舊物不煩多訓用稱彛
章加食邑三千九百戶食實封三百戶吳越國王功勤

如故符至奉行

開寶二年秋八月宋遣使至賜生辰禮物并御衣紅袍一副金鎖甲一副及駝馬百頭是時王貢祕色窰器于

宋

錢氏有國日供奉之物不得臣下用故曰祕色又云越州燒進

開寶三年春三月王親饗五廟秋九月遣世子惟濬入貢于宋是月宋詔王出師伐富州王將起行尋以道遠詔止之是時宋命翰林學士陶穀使于我王宴以水族數百器又令膳人烹蝻蚱至螿蟻十餘種以進

順存錄云陶穀

來使忠懿王宴之因食蝓蟬詢其族類王命白蝓蟬至
盤地凡十餘種以進毅曰真所謂一解不知一解蓋以
譏王也王因命進葫蘆羹曰此先王時有此品味庖人
依樣造者毅在中朝或作詩嘲之曰堪笑翰林陶學士
年年依樣畫葫蘆故王以此戲焉又云毅使于我王因
舉酒令曰白玉石碧波亭上迎仙客毅對曰耳王聖
明天子客錢塘一云林德奉使事○人王置金鍾宴毅
會毅卧病請之贈以十副毅謝詩云乞與金鍾並眼明
及出境復有井蛙休
恃險句人謂其狡譎

開寶四年秋九月宋遣使賜生辰禮物衣冠劔佩等冬
十一月宋有事于南郊制加王食邑二千戶實封六百

戶仍改賜開吳鎮海

一作鎮越

崇文耀武宣德守道功臣

開寶五年春三月王世子惟濬貢奉歸賚宋賜吳越國
賢德順睦夫人珠翠冠帔各一副秋九月王遣元帥府
掌書記黃彛簡入貢宋帝諭曰汝歸語元帥江南倔強
不朝我將討之元帥當練兵甲助我無惑人唇亡齒寒

之言

宋史云黃彛簡入貢上謂之曰汝歸語元帥當助我無惑人言云皮之不存毛將安傅特命有司造

大第于薰風門外連亘數坊棟宇宏麗儲峙什物無不
悉具因召進奏使錢文贊謂之曰朕數年前令學士承
旨陶穀草詔比來城南建離宮令賜名禮賢宅以待李
煜及汝主先來朝者以賜之詔以草示文贊賜叙戰馬
及羊諭
旨於御

王密表謝且請師期冬十月王親饗五廟復謁

寶塔寺拜先王銅容

開寶六年秋八月宋遣使賜王玉帶御衣及生辰禮物
是月王寓書于宋宰相趙普饋海物十器冬十一月大
雪之氣如烟是歲命南山建總持寺

開寶七年春二月庚辰朔日食夏五月宋勅進奏使錢
文贄賜王襲衣玉帶玉鞍勒馬各一事金器二百兩銀
器三千兩錦繡一千段秋七月宋詔王伐江南畧曰禁
衛出軍雲臺選將尅期攻取直抵昇州卿任重統戎心

專蕩寇早者曾披章奏具述事宜今驗姦兇果符陳請
開茲討伐必罄忠勤是月王密遣行軍司馬孫承祐入
奏機事九月承祐至自京師宋遣內客省使丁德裕賜
王生辰禮物冬十月宋授王東南面招討制置使

宋史云遣

丁德裕齋詔以倣為昇州東面招撫制置使今從備史補遺

賜劔甲鞍馬仍命丁德

裕為行營兵馬都監又以雲騎雄捷等指揮步兵凡千
人輔王進攻常州庚申王親率鎮國鎮武親從上直等
都指揮使王諤等五萬餘人發自國城丁德裕為先鋒

使癸亥次秀州有氣黑色形如覆舟當行府之上占者
曰王氣也丙寅王率諸軍入常州有獲巨龜于旌門之
下占者曰玄武之應也戊辰王克闕城常人以牙城自
守王營于九僊墩命親從指揮使凌超等分營四門鎮
國都指揮使王諤攻江陰鎮武都指揮使金彥滔攻宜
興十一月宋遣弓箭庫使王文寶來宣諭仍賜湯藥是
月王遷行府于敵城南門金彥滔師次宜興拔之獲其
令尉等官十二月癸亥王親率軍將攻常州牙城殺敵

兵二千餘人甲子獲江南人馬尋拔呂城卒未敗援兵於城北江南大將盧絳宵遁翼日命鈴轄使沈承禮告捷於宋是歲以從子昱為福州刺史昱築福州夾城自光順門而西東武門而北又自東武門而南凡九百餘丈高丈有六尺厚半之開沿城河三千餘尺

開寶八年春二月宋遣內直使陳理勞王別以戎服五萬副賜王軍卒夏四月王復親攻常州牙城江南知常州軍州事禹萬誠遣觀察推官鄭簡納款于軍門王從

其請遂拔常州江南國主貽王書王不答以其書陳宋
五月宋授王守太師尚書令加食邑六千戶實封九百
戶是月宋詔客省使丁德裕權知常州又勅遣上侍禁
李輝賜王襲衣玉帶玉鞍勒馬各一事金器二千兩銀
器一萬兩錦綵一萬段詔王歸國王遣兩浙諸軍都鈐
轄使沈承禮等率兵隨宋師平潤州進討金陵冬十一

月江南平王奉表稱賀且請入覲

先是宋太祖召進奏使汪知果令諭旨于

王曰元帥克毗陵有大功俟平江南可暫來與朕相見以慰延想之意即當遣還不久留也朕已三見上帝豈

食言乎又與黃吳商言亦
畧同此意故王有此謂

十二月宋論功遣東頭供奉

官徐靖賜王綵錦御衣金盃甲御酒馳馬等物仍賜優
詔褒焉加王麾下孫承祐平江軍節度使沈承禮寧海
軍節度使餘授防禦使三人刺史六人是月宋詔許王
入覲

開寶九年春正月王發自國城先是宋帝因王入覲勅
遣供奉官張福貴等開古河一道自瓜州口至潤州江
口連龍舟堰以待王舟楫二月辛丑王次寶應宋遣引

進使翟守素賜王湯藥甲辰次泗州辛亥宋遣內司賔
賜王夫人孫氏湯藥法酒是日次近畿宋帝詔皇子德
昭迎勞翼日王至京師賜宴于迎春苑尋詔王居禮賢
宅王未至前宋帝幸其宅躬自閱視異數也戊午王朝
見于崇德殿進賀平江南及允朝覲表貢奉犀玉帶

別史

載忠懿入朝進寶犀帶于藝祖藝祖曰朕有三條與此
不同忠懿請宣示藝祖笑曰汴河一條淮河一條揚子

江一條忠懿愧服

及寶玉金器五千餘事上酒一千瓶遂賜宴

長春殿中席就幄次賜黃金照匣黃金鈔鑪及餅盤等

已未王進謝復詔宴于後苑丙寅宋帝幸禮賢宅賜金二千兩銀三萬兩絹二萬疋又賜王世子惟濬及通儒學士崔仁冀等絹帛有差是日王遣世子惟濬進通犀帶金玉寶器又貢白金十萬兩絹五萬疋乳香五萬斤以助郊祭三月庚午宋帝詔曰古者宗工大臣特被隆眷或劔履上殿或詔書不名率由豐功待以殊禮今我兼其命數用獎勵賢輝映古今允為優異咨爾吳越國王錢俶德隆宏茂器識深遠撫輿區于吳會勤洪伐于

宗彞昨以江表不庭王師致討委方面之兵柄克常潤
之土宇而乃執圭來庭垂紳就列罄事君之誠懇為羣
后之表儀爰峻徽章以旌元老可特賜劔履上殿書詔
不名妻賢德順睦夫人孫氏為吳越國王妃仍詔內臣
賜王妃湯藥法酒茶果等五百餘事封王女為彭城郡
君王獻白金六萬兩絹六萬段為謝宋帝數詔王與世
子惟濬宴射後苑汎舟池中時惟親王預席王拜謝久
之宋帝令內侍掖起手酌酒以賜王王伏地感泣且曰

子子孫孫盡忠盡孝宋帝曰但盡我一世耳後世子孫亦非爾所及也一日召王內宴獨晉秦二王在坐酒酣宋帝命王與二王叙昆仲之禮王叩頭涕泣固讓乃止又常宴宮中出內伎彈琵琶王獻詞曰金鳳欲飛遭掣搦情默默宋帝遽起拊王背曰誓不殺錢王會宋帝將以四月幸西京王懇請扈從不許已而留世子惟濬侍祠令王歸國啓行之時先期宋帝宴錢于講殿賜窄衣玉束帶玉鞍勒馬玳瑁鞭金銀錦綵二十餘萬銀裝兵

器八百事謂王曰南北風土異宜漸及炎暑卿可早發
王涕泣言願三歲一朝宋帝曰川陸迂遠當俟詔旨即
來次日王妃入辭中宮賜金器三百兩衣著二千疋銀
二千兩臨發宋帝特賜導從儀衛之物鮮華奪目自禮
賢宅至迎春苑絡繹道路不絕又親賜黃袱一束封緘
甚固戒王曰途中宜密視是月甲戌王離京師宋帝詔
秦王屆期賜宴于迎春苑勅遣引進使翟守素押翰林
御厨儀鸞送至睢陽次日復遣內使乘驛至賜王湯藥

二金盒王妃湯藥一金盒戊子王再拜啓所賜黃袱視
之皆宋臣乞留王章疏王甚感懼夏四月丙辰王至國
城丙寅命子惟治詣宋謝恩常視事功臣堂一日命坐
于東偏曰西北者神京在焉天威不遠咫尺敢居乎每

修貢必焚香而遣

是月二十一日宋又降制曰漢鄼侯以第一論功方賜劔履上殿唐汾陽

以累贈元老乃命詔書不名期越其章乃殊乎禮咨爾
吳越國王錢俶岳重雉名神符妙畧橫江負海世為開
國之臣復信資忠位襲伏君之節爵位崇極踰三十年
昨以吳人不庭致使王師問罪付東南之兵柄蓋常潤
之寇塵始則兵鉞親臨早平邊壘次則師徒適至克彼
江城洎借國之傾亡亦純誠之贊助望闕入覲執圭來

朝當妖氛未平按彤車而發憤先徒畫掃望金闕以朱
奔為臣及茲其節可尚大朝典禮汝特為優帶劔不名
所尊非過朕今議賞惟爾攸宜所以異乎羣僚殊彼
恒品云云茲按帶劔不名前已有詔今又降制也 五

月宋加王食邑三千戶實封一千戶夏六月癸卯王進
宋銀絹綿以萬計秋八月宋遣進奏使汪知果賜國信
及生辰禮物冬十月癸丑宋帝崩晉王光義即位遣侍
御史雷德驤來告哀王帥府僚將校等發哀王二日不
食十一日不視事十一月王遣元帥府牙內都指揮使
子惟渲賫通天犀帶金器五百事玳瑁五百事塗金銀

香龍等巨萬詣宋稱賀是月宋遣樞密都承旨武玘制加王食邑五千戶實封一千戶仍賜龜魚寶帶襲衣等物吳越國王妃孫氏薨十二月己亥宋改是歲為太平興國元年

太平興國二年春二月宋遣給事中程羽來歸王妃之
賙謚王妃曰闕三月宋授王尚書令兼中書令勅曰

咨爾吳越國王錢俶天賦純誠神資秘畧玉鈐金匱生
知戰伐之機列鼎鳴鐘世襲公王之位斧鉞之威權素

重梯航之職貢惟勤特授大謀共除殘孽訓驍勇之士
卒所向無前指要害之州城期於必取涉厯寒暄之候
辛勤寇敵之威簡自朕心豈忘嘉獎捷書纔至賞罰亟
行載徵耆老之文俾盡優崇之禮爾其恭膺休命善撫
輿區知荷寵以難忘思審終之為美庇民尊主傳帶礪
於無虞翼子貽孫保箕裘而不墮扶成昌運永光令圖
可特授尚書令兼中書令天下兵馬大元帥散官如故
夏五月王下令文軌大同封疆無患凡禦敵之制悉除

之境内諸城有白露屋及防城物亦令撤去秋八月宋遣翰林學士都承旨李昉賜王生辰禮物是月王遣兩軍節度使世子惟濬入朝于宋修覲禮王貢品物鉅萬又請歲增常貢宋帝不許

太平興國三年春正月以皮光鄰為温州刺史二月王發國城三月次揚州宋遣閤門使梁迥內班閤承翰來賜王湯藥茶酒巳酉朝見宋帝于崇德殿宋帝命親王迎接賜宴于長春殿令恩赦侯鉉違命侯煜陪坐王進

上法酒五百餅金銀器物三千兩綾綿一萬龍鳳香等
二萬事翼日宋帝賜王生料羊二百口法酒三百餅粳
米二百石襍買錢一萬緡又賜從行將校等官錢三萬
緡已又詔王宴後苑王復進寶王金銀酒器等三千餘
兩通犀帶一條龍鳳龜魚帶六事時宋帝命射每中的
王即進金銀器三百兩帝中的凡六焉夏四月宋帝復
宴王于崇德殿已又宴于苑中時世子惟濬侍宴明日
王奉表謝畧曰御苑深沉想人臣之不到天顏咫尺惟

父子以周親未幾又宴王于南郊御莊王又上金銀酒器無算酒酣至暮而歸翼日宋帝遣內司賓賜王御衣紅袍寶帶御馬一匹儀鸞一副會是時閩師陳洪進納土王上言臣伏有懇誠貯于肺腑幸因入覲輒敢上聞蓋虞神道之害盈必異天時之從欲除本道軍甲器已曾奏納外所有封吳越國王及天下兵馬大元帥職名并乞解罷凡頒詔命悉願名呼庶聖朝無虛授之恩微臣免速亡之禍宋帝優詔不許五月乙酉丞相崔仁冀

勸王納土不然禍且立至王遂決策上表云臣慶遇承平之運遠修肆覲之儀宸眷彌隆寵章皆極斗筭之量實覺滿盈丹赤之誠輒茲披露臣伏念祖宗以來親提義旅尊戴中京畧有兩浙之土田討平一方之僭逆此際蓋隔朝天之路莫諧請吏之心然而稟號令於闕庭保封疆於邊徼家世承襲已及百年今者幸遇皇帝陛下嗣守丕基削平諸夏凡在率濱之內悉歸輿地之圖獨臣一邦僻介江表職貢雖陳於外府版籍未歸於有

司尚令山越之民猶隔陶唐之化太陽委照不及郛家
春雷發聲兀為聾俗則臣實使之然也願以所部十三
州一軍八十六縣戶五十五萬六百八十兵一十一萬
五千三十六獻於下執事宋帝答詔曰卿世濟忠純志
遵憲度承百年之堂構有千里之湖山願親日月之光
遽忘江海之志甲兵樓櫓既悉上于有司山川土田又
盡獻于天府舉忠效順前代所無書之簡編永彰忠烈
所請宜依王朝退將吏始知之皆慟哭曰吾王不歸矣

宋帝隨賜王誓書

器曰皇帝錫命吳越國王錢俶自朕
暴臨以來獨持短表自獻封疆將三

千里錦繡山川十三郡魚鹽世界皆歸皇宋盡屬有司
誓書到日率土之濱皆不問罪犯輕重各出囹圄錢氏
之家恐係遠房或高曾祖至曾玄孫以下議杖笞傷遇
死一人至七人者放七人以上者奏無居址者遇所屬
州軍縣邑僧寺道觀令自措躬安歇無官者可以蔭資
有官者重躋極品妄議讒言奉持減剝並不如命錢氏
到日如朕親行今給此
書永為照據與國同休

丁亥宋升揚州為淮海國制王

依前守太師尚書令兼中書令改封王為淮海國王食
邑一萬戶實封一千戶仍充天下兵馬大元帥改賜寧
淮鎮海崇文耀武宣德守道功臣以王弟儀信並為觀

察使以王世子惟濬為節度使兼侍中王子惟治為節
度使惟演為團練使惟灝及王從子郁昱並為刺史仍
賜禮賢宅為永業詔曰漢寵功臣聿著帶河之誓周尊
元老遂分表海之邦其有奄宅勾吳早綿星紀包茅入
貢不絕于累朝羽檄起兵備嘗于百戰適當輯瑞而來
勤爰以提封而上獻宜遷內地別錫爰田彌昭啓土之
榮俾增書社之數吳越國王錢俶天資純懿世濟忠貞
兆積德於靈源書大勲於策府近者慶冲人之踐祚奉

國珍而來朝齒草羽毛既修其常貢土田版籍又獻于
有司願宿衛于京師表乃心于王室眷茲誠節宜茂寵
光是用列西楚之名區析長淮之奧壤建茲大國不遠
舊封載疏千里之疆更重四征之寄疇其爵邑施及子
孫永夾輔于皇家爰對揚於休命又授王麾下將校孫
承祐沈承禮並為節度使等官賓幕宰相而下拜官者
二千五百人是歲秋七月中元節汴京張燈宋帝令有
司于王宅前設燈山陳聲樂以寵之越數日復宴王于

崇德殿命王世子惟濬侍焉八月宋帝令王總麻以上親屬及管内官吏悉歸京師凡千四十四艘隨命以杭州伶人馬迎恩等四十五人賜王俾備旦夕宴樂

宋史云杭州

州送做樂人凡八十有一人詔以三十六人還杭州四十五人賜做做上表謝上親畫付中書送史館九

月九日大宴王于長春殿冬十一月朔南郊禮畢宋帝詔加食邑二千戶實封一百戶四年春二月朔王入朝大宴于苑中宋帝顧王甚厚飲必命醕及罷拜不能興宋帝命以金裝擔子送王歸第王小心畏慎每晨趨闕

必先至宮門假寢以待一日夜漏四鼓清蹕啓行時風
雨大作諸節鎮無一人至者宋帝見王與世子惟濬稱
歎久之謂王曰卿中年宜避風冷自今入見不須太蚤
仍輟御前四大燭賜焉是月宋帝征太原王請從行夏
四月北漢主劉繼元降宋帝御連城臺誅軍中先亡命
於太原者顧謂王曰卿能保全一方以歸于我兵不血
刃深可嘉也仍賜紅袍玉鞍轡馬王頓首謝秋七月宋
帝凱旋大行封賞加王食邑二萬戶實封二千戶五年

春正月宋帝御朝元殿受朝賀王以劔履升殿觀者榮

之三月清明節宋帝御大闕殿召王乘馬擊毬仍以毬

杖引毬授王俾王擊之命王曰卿中年宜以此娛夏四

月王以風疾乞假宋帝遣御醫中使一日三至第六月

宋帝親幸禮賢宅撫慰再四賜金器一千兩錢一萬索

銀一萬兩綾絹一萬疋王遣子惟治進謝秋九月王進

朝崇德殿上金裝定器二千事水晶瑪瑙寶裝器皿三

十事珊瑚樹一枝冬十月宋帝宴王于朝元殿六年王

風眩復作自是賜王免朝夏五月宋帝遣中使賜王文
楸碁局水精碁子且諭曰朕機務之餘頗曾留意以卿
在假可用此自怡一日內臣趙海過王探懷中藥百粒
以進王方命茶盡餌之海既去家人皆泣蓋有所疑也
王笑曰主上待我厚中貴必良藥耳宋帝聞之大驚即
杖海流之遠郡冬十月王朝謝于文德殿宋帝攜手撫
問良久遂賜宴于長春殿八年夏五月宋帝遣內使賜
王珍珠黃羅織一龍香涼茶二十斤秋八月王遣世子

惟濬貢宋帝白龍腦香一百斤金銀陶器五百事冬十

一月王表求罷職

表曰臣以蕞爾之軀蒙被恩寵賦祿百萬兼職數四元帥之任實本于兵

權國王之號蓋屏於帝室尚書總百揆之重中書掌八柄之繁維師寇於上台開府當於極品臣之孱瑣罔克負荷邦國之制式著等威名器之間固有涯分徒速罪戾以取顛隲伏望聖旨持從者罷 宋帝不許

及表三上乃優詔褒之但罷兵馬大元帥餘如故仍加

食邑三千戶實封五百戶

詔曰分茅胙土所以彰世家之榮大輅繁纓所以表名器

之重至若褒寵勲德度越典常咨于舊章爰推異數乃有體好謙之德形固讓之辭敦諭再三確乎不拔用曲至公之論式光知止之風淮海國王錢俶方岳炳靈風雲通感奄有勾吳之地不忘象魏之心掃境來朝舉家

宿衛藉其土宇入于朝廷式昭職貢昨之淮海居天子
二老之任啓真王萬戶之封併加寵章用答忠順而乃
屢形表疏願避官榮發於深衷誠不可奪若以靈臺偃
伯武庫橐兵天下一家書軌之無外五侯九伯征伐之
不行願寢元帥之名兔狗由表之請具乃世祚明德存
于帶礪之盟帝賚良弼寵以台輔之任極取貴之爵增
行食之封非足酬庸適以昭德兔膺渥澤
克副眷懷可罷天下兵馬大元帥餘如故

雍熙元年春

二月宋帝幸太乙宮路由禮賢宅王力疾出見于道旁

宋帝駐輦撫諭是冬郊裡禮畢改封王為漢南國王加
食邑二千戶實封四百戶仍改賜寧海鎮國崇文耀武
宣德守道功臣二年春宋帝取王草書以進詔賜金匣

玉硯及龍鳳墨紅綠筆蜀牋盈丈紙皆百數秋九月王奉宋帝命扶疾宴于崇德殿冬十月宋帝遣內使賜王夫人龍鳳珠冠兼賜幕府將校幣帛授王子惟治等九人官爵有差四年春出王為武勝軍節度使改封南陽國王王久被病宋帝詔免入辭將發賜玉束帶金唾壺椀盞等夏四月王赴南陽宋帝命王子惟渲惟灝隨行已而王四上表讓國王宋帝遣給事中崔灝改封王為許王加食邑一萬戶實封二千戶仍改賜安時鎮國崇

文耀武宣德守道功臣端拱元年春二月徙封鄧王加
食邑一萬戶實封三千戶是秋宋帝遣皇城使李惠河
州團練使王繼恩賜生辰器幣王與使者宴飲極歡晡
時王于西軒命左右讀唐書數篇又令諸子孫誦詩未
訖風眩復作至漏四下而薨是夕有流星墜于正寢之
上光燭滿庭年六十王既以己丑歲八月二十四日誕
生至是復于八月二十四日即世更與文穆王薨日同
人皆異之訃聞宋帝為廢朝七日勅中使王繼恩賈繼

勲護喪歸京師追封秦國王謚曰忠懿仍正衙備禮發冊冊曰皇帝若曰昊穹眷祐賢哲挺生稟象緯之純精負經綸之盛業作民父母為國翰垣其存也冠中臺而長諸侯其沒也峻徽章而崇禮命咨爾故安時鎮國宗文耀武宣德守道功臣武勝軍節度鄧州管内觀察處置等使開府儀同三司守太師尚書令兼中書令使持節鄧州諸軍事行鄧州刺史上柱國鄧王食邑九萬七千戶食實封一萬六千九百戶賜劔履上殿詔書不名

錢俶嗣祖考之舊德奠東南之奧區開國承家本仁祖
義以忠孝而保社稷以廉讓而化人民勤翼戴於累朝
克惠綏於一境世傳威畧老慕聲名當武庫職兵洞閱
詩書之府洎秣陵問罪雄張犄角之師致區宇之同文
賴忠良之協力逮予纂紹益享崇高蘊明哲而保身務
傾輸而竭節盡獻土壤來歸闕庭予嘉乃功洵錫殊寵
而道隆簡退志尚謙冲屢辭卻縠之權難奪范宣之讓
朕深惟勲舊俾就養頤爰出殿于大邦庶聿臻于眉壽

式繫元老求輔眇躬何天道之難謀嗟梁木之斯壞長
河既往空存申令之勲征鹵云亡但見雲臺之像賙賻
從于異等嗟悼廢于臨朝寧酬柱國之勲未開臣之

分庸加典冊以厚始終今遣使大中大夫尚書工部侍

郎上柱國汾陽郡開國侯食邑一千戶賜紫金魚袋郭

贄一作贄持節贈爾為秦國王嗚呼德無不報予敢忘於

格言魂而有知爾尚歆於天命二年春正月丁酉宋帝

遣使押翰林儀鸞鹵簿鼓吹葬王于洛陽縣之賢相里

陶公原真宗朝特詔尊王尚父先是武肅王時有術者告曰王如廣牙城改舊為新有國止及百年若填築西湖以為公府當十倍於此武肅王笑曰豈有千年而無真主者乎即于治所增廣之及王歸宋計三世五王總九十八年果不盈百云

先是太平興國初有僧歌于市曰還鄉寂寂杳無踪不掛征帆

水陸通踏得故鄉田地穩更無南北與西東或問故但云明年大家都去未幾果有納土之應又忠懿王將內附決于天竺大士夢大士以綵繩圍繞其宅歸宋之意始定後子孫遂金紫不絕又戊寅歲永嘉縣人伐木破其中古文曰天下太平凡五片皆然是亦天下渾一之兆也

王任太師尚書令兼中

書令國王凡四十年為元帥三十五年位極富貴善始
善終福履之盛近代無比頗知書雅好吟咏有詩數百
首曰政本集國相元德昭宋翰林學士陶穀為之序性
謙和未曾忤物自奉頗薄常服大帛之衣崇信釋氏前
後造寺無筭入宋後又以愛子為僧為人寬洪大度常
大會賓客食豔臠而得庖人濡血紙于器中王遽藏之
裒顧左右曰勿令掌膳者知太平興國末趙普再入相
與盧多遜不相能一日普召王世子惟濬謂曰朝廷知

多遜求取元帥財物今未鞠劾者恐累元帥耳請具所
遺之物列狀上聞惟濬歸白王王曰我入朝時荷主上
殊常之遇故左右大臣咸有饋物非獨盧相也豈可見
人將溺而加石焉普聞之深自嘆服

李至碑文曰王事
文穆晨昏定省一

杯之藥必經其手一組之羞必嘗其味當時物議翕然
稱之年十三先君捐館哀若成人泣血絕漿殆無生意
廣順中丁內艱杖而後起氣息纔屬有識增感行路傷
情又曰從劾向化盡平宿憾欣容假道俾效輸琛陳洪
進繼遣行人亦由王境王皆豐其館穀假以子八人惟
舟車恩禮不衰殆將二紀其樂人事大如此

濬惟治惟演惟灝惟潛惟濟惟渲惟閩惟灝至賀州團

練使惟渲韶州團練使惟潛左龍武將軍獎州刺史惟
演惟濟皆童年為宋帝所稱召見慰勞並起家諸衛將
軍惟演子冀國公暄子會稽郡王景臻景臻子榮國
公忱封爵世世不絕先是武肅王與戰士多賜己姓忠
懿王歸宋皆稱同宗淳化三年太宗詔令復本姓又浙
中劉氏改為金氏者亦令還故景德中有司請以禮賢
宅為司天監真宗以先朝所賜不許大中祥符八年惟
演等復表上之賜錢五萬貫仍賜宅各一區熙寧時知

杭州軍州事趙抃言錢氏父祖妃夫人子孫墳廟在錢塘者二十有六在臨安者十有一願以龍山妙因院為觀使錢氏之孫為道士曰自然者居之治其祠墳神宗命賜名曰表忠觀理宗給田三百畝付觀旌功焉

素歐
陽五

代史言吳越自武肅王以後常重歛其民下至雞魚卵殼必家至而戶取諸案吏多持薄量為筭數人不堪其苦人順存錄曰錢氏凡欠一斗者多至徒罪徐瑒常使吳越云三更已聞獐麋號叫達曙問于驛吏乃縣司起征科矣江表志云吳越時民多赤體有敝葛褐者多用竹蔑繫腰間執事非利不行吏胥雖貧者亦家累千金

疑或傳聞


過甚云

論曰錢氏據有兩浙幾及百年武肅以來善事中國保障偏方厥功鉅矣宋興後王益傾資修貢獻宋祖曰此吾帑中物何用獻為常讀宋兩朝供奉錄中間稱忠懿王入貢如赭黃犀龍鳳龜魚仙人鰲山寶樹等物及通犀帶七十餘條皆希世之寶而金飾玳瑁器至一千五百餘事水晶瑪瑙玉器至四千餘事珊瑚十高三尺五寸金銀飾陶器一十四萬餘事金銀飾龍鳳船舫二百艘銀裝器械七十萬事白龍腦二百餘斤玉帶二十四

紫金獅子帶一金九萬五千餘兩銀一百一十萬兩錦
綺色綿以萬萬計而舉朝文武闡寺多所饋遺竭十三
州之物力以供大國務得中朝心國以是而漸貧民亦
以是而得安諺曰皮之不存毛將安附嗚呼殆非所以
論吳越矣



十國春秋卷八十二



總校官庶吉士臣張能照

校對官檢討臣王鍾健

騰錄貢生臣李敬敏

欽定四庫全書薈要

史部

十國春秋卷八十三

四三

詳校官員外郎臣楊世綸



欽定四庫全書薈要卷八千六百四十九

史部

十國春秋卷八十三

檢討吳任臣撰

吳越七

列傳

趙國太玄太夫人水丘氏

武肅王莊穆夫人吳氏

昭懿夫人陳氏

文穆王恭穆夫人馬氏

恭懿夫人吳氏

仁惠夫人許氏

忠獻王夫人杜氏

元妃仰氏

忠懿王妃孫氏

附俞氏黃氏

趙國太夫人水丘氏武肅王母也先是英顯王娶于母族故兩世皆為河南水丘氏以武肅王貴初封河南太君進封吳興郡太夫人再封秦國太夫人王事母至孝常遊後庭層樓太夫人春秋高不能上王親負而登焉天復元年九月薨葬于錦南鄉武肅王命吳仁璧作志銘不從殺之事具仁璧傳天寶初梁追封趙國太玄太

夫人

莊穆夫人吳氏安國縣人也父仲忻浙西觀察判官累贈吏部尚書初武肅王議昏仲忻家咸以王豁達大度不事產業將不許而夫人世父負知人之鑒固趣成焉及歸室閨門整肅孝敬盡禮武肅王性嚴急常怡顏以諫之撫愛諸子有如一體歷封燕晉二國至吳越國正德夫人夫人常遊奉國寺王命載帛百緡以備散施夫人曰妾備嘗機杼之勞遽以遊賞靡費非恤民之道遂

不受而罷夫人每歲春必歸衣錦軍以為恒武肅王語
之曰陌上花開可緩歸時人用其語以為歌曲至今傳
之天寶十二年薨年六十二謚曰莊穆有子十三人又
錦南鄉慈智寺西有梁國夫人墳扶風夫人墳韋夫人
墳或云皆武肅王夫人也其名號不具見史冊姑為闕
疑云

按文苑英華載莊穆進封
晉國制錢珣筆也今不錄

昭懿夫人陳氏文穆王母也清泰初薨贈晉國太夫人
謚曰昭懿文穆王性極孝尊禮母黨厚加賜與而未嘗

遷官授以重任故陳姓無有以功名顯者

恭穆夫人馬氏安國縣人父綽雄武軍節度使綽初以舊恩娶武肅王女弟未幾武肅王復為文穆王娶綽女是為夫人夫人性聰慧勤于職武肅王常禁中外畜聲伎而文穆王年逾三十無子夫人為之請武肅王喜曰我家宗祀幸汝得主之美乃聽文穆王納諸姬鄺氏生弘傳弘侔許氏生弘佐吳氏生弘俶衆妾生弘僊弘億弘偓弘仰弘信既長夫人皆均養之常置銀鹿于帳前

坐群兒于上而弄之喜動顏色初封越國加封吳越國
莊睦夫人天福四年薨年五十勅謚曰恭穆葬于衣錦
軍之慶仙鄉良山村

恭懿夫人吳氏名漢月錢塘人父珂官中直指揮使幼
以婉淑侍文穆王忠懿王盖其所出也恭穆夫人絕憐
愛之夫人善鼓琴性慈惠而節儉頗尚黃老學居常被
道士服惟布練而已每聞王決重刑必輦蹙以仁恕為
言母家或有遷授多峻阻之及入見時加訓勵間以督

責故諸吳終夫人之世不甚驕恣乾祐二年十一月封

吳越國順德太夫人

五代會要曰封贈之制婦人有國邑之號死有謚近梁朝賜張全義

妻儲氏為賢懿夫人又改莊惠蓋當時特恩也

据此則吳越莊睦順德之號乃特典非舊例也

廣順二

年六月薨年四十謚曰恭懿

五代會要云追封故順德太夫人吳氏為恭懿夫人

今從吳越備史註以恭懿為謚

是秋勅葬于慈雲嶺西原明年忠懿王

建報恩元教寺以資冥福已又鑄銅象二致奉國金地

二尼寺志孝思焉寧國節度使吳延福太夫人弟也建

隆初延福兄弟五人有異圖左右勸王誅之王曰先夫

人同氣安忍寘于法言訖嗚咽流涕但黜延福等于外

而不加刑

按西湖志吳延奐請東陽善導和尚舍利建塔于山顛附以佛廬開寶初賜額曰崇壽院

又武林梵志云吳越相吳延奐開寶中建崇壽院內有九級浮圖名應天塔延奐疑即延福諸弟也

仁惠夫人許氏名新月台州人也雅善音律文穆王後

庭樂部悉命夫人掌焉初魯國夫人生孝獻世子侍御

咸尊禮之有女僧契雲者司香火于麗春院素名能知

人至是謂夫人曰彼廊夫人遠不能及也夫人宜自愛

文穆王襲位勅封吳越國夫人開運二年薨年四十四

謚曰仁惠

文獻王夫人杜氏內牙都監使杜昭達之姑也未幾以病薨

元妃仰氏湖州人父仁詮以牙將事文穆王有功積官至寧國軍節度使天福八年冬忠獻王納為元妃未幾

薨葬于國城外之小麥嶺

武林舊事仰妃墓在小麥嶺下

忠懿王妃孫氏名太真錢塘人奉寧節度使承祐之姊也端重敏慧延接姻親及宗屬皆曲盡恩禮好學讀書

通毛詩魯論大義少事忠懿王甚謹一以儉約為訓非
宴會未嘗為盛飾忠懿王征常州妃居國城內時時遣
內侍撫問諸將及從征將帥之家國人稟畏如奉王旨
漢制拜夫人周勅封吳越國賢德夫人宋開寶五年進
封賢德順睦夫人九年王與妃及世子惟濬入覲加封
吳越國王妃令惟濬賫詔賜之宰相言異姓無封妃故
事太祖曰行自我朝表特恩也王獻金幣以謝未幾妃
辭謝中宮錫金器衣著無筭是歲歸國薨葬石人嶺下

明年宋遣程羽來歸王妃之贈謚曰明妃常以一物

施龍興寺形如朽木箸寺僧未之珍也偶出示舶上波斯人曰此日本龍蓋簪遽以萬二千緡易去又有俞氏失其家世封號忠懿王之繼妃也宋太宗時進金銀十餘萬犀二十株通犀賴犀玉帶三十二條水晶佛像十二事其貢獻頗不貲云復有黃妃者常於南屏山雷峰顯嚴院建塔奉藏佛螺髻髮始以百文十三層為率尋以財力未充始建七級已又用形家言止存五級名黃

妃塔 淨慈志作黃妃塔 或作王妃塔誤

後以地產黃皮木遂謚為黃皮

塔俗稱雷峰塔焉塔高四十許丈兀立層霄金碧璀璨

飛甍懸鈴種種嚴飾建塔時以石刻華嚴經鱗甃其下

措法絕類歐陽率更忠懿王有建塔記

吳越國王錢俶建黃妃塔碑記

曰敬天修德人所當行之矧俶奉嗣玉圖承平茲久雖未致全盛可不工體祖宗師仰懼晏氏慈忍力所沾溉邪凡於萬幾之暇口不輟誦釋氏之書手不停披釋氏之典者蓋有深旨焉諸宮監尊禮佛螺層峻猶佛生存不敢私秘宮禁中恭奉瑤貝剖宰堵波於西湖之湖以奉安之規撫宏麗極所未見極所未聞宮監弘願之始以千文十三層為率爰以事力未允始從七級辨吳初志未滿為憚計甃灰土末油錢瓦石與夫工藝像設金

碧之嚴通緝錢六百萬現會稽之應天塔所謂品空度
者出沒人間凡三世然後同願心宮監等合力除彈
指垢幻出瑤坊信多實如來分身應現使之然耳戲玄
度有所不逮塔成之日又鵝華嚴諸經圍繞八面真成
不思議奴數大精進幢於是合十指爪以替噴之
塔曰黃化云英越國王做拜手誥書于經之尾

武肅王弟鏢

鐸

楚國公鐸

從弟鎰

鍊

鏢武肅王同父弟也少驍勇善戰天祐初淮南將陶雅
攻婺州命鏢將兵往救無功天寶中吳兵攻蘇州鏢以
杜建徽往援圍得解已而高澧叛湖州鏢以指揮使稟

王命討愷明年武肅王巡湖州署鏐為刺史鏐嗜酒殺人懼王之督已也遂以四年冬殺都監潘長推官鍾德奔吳吳武義初以為右龍武統軍終于其職方鏐出奔時有子二人長者生五年矣次者未周粹武肅王憐之養于宮令與諸子同研席名其長曰可團次曰可圓冀其父得歸聚云

鐸亦武肅王同父弟累官睦州刺史領安南軍節度使同平章事

鐸字輔軒英顯王有五子長武肅王次錡次鏢次鐸次
即鐸也生而有文在手曰王及長漸滅既生而英顯王
即世武肅王多方鞠育及武肅王薨鐸請服通喪以報
之性多藝善繪畫

圖繪寶鑑云
錢鐸善丹青

尤精音律承制累授溫

明二州刺史檢校太尉奏遷恩州防禦使文穆王時除
兩浙行軍司馬拜命之日儀注特甚尋奏改本州團練
使順化軍節度使封楚國公開運二年卒年五十五謚
曰忠簡

鎰武肅王從父弟也積功為龍武統軍田頎叛楊氏武肅王命鎰屯宣州以待變及陳詢叛睦州吳遣陶雅入寇而鎰與顧全武王球實在行間遂為吳人所鹵未幾我軍獲吳將李濤天寶十四年吳乃遣鎰以易濤鎰歸署為鎮海軍節度副使

鉞武肅王從弟也龍紀時淮南六合鎮遏使徐約已得蘇州武肅王命鉞將兵攻之約驅民盡墨鏡其形曰願戰南都從事已而勢寢窘遂與其下泣別入海死鉞由

是拔蘇州未幾州復陷王又遣師平之久之授鉅蘇州

招緝使

倭史作
安撫使

頗以戰功稱又衢州刺史鋸睦州刺史

鎮亦武肅王從弟其名時時見于史籍焉

武肅王子寧國公元璣 雲國公傳瑛

金華郡王元懿 廣陵郡王元瑯

子文奉
文炳

餘姚侯傳曜 子仁俊 大彭侯傳球

扶南侯元球 淮陰侯元珣

新安侯傳璠

雲國公傳璟

吳興侯元琳

寧明王元瓚

元弼

元璣武肅王第二子也母慶安夫人胡氏元璣性氣寬厚沉靜寡言多尚儒釋不喜奢侈過歷中外所在黎庶安之累官寧國軍節度使同平章事檢校太傅封宛陵侯晉封寧國公長興四年十二月卒元璣早喪妻終不繼娶無嗣

傅瑛武肅王第三子

一曰長子

母莊穆夫人吳氏原名傅錯

未幾易錯為瑛天性英敏頗敦儒學聚書數千卷善騎射工草隸徐許之叛與三城都指揮使閉門拒寇有功時城中有錦工二百餘人皆潤人也傳瑛慮其為變乃詐傳王令百工悉免今日工作遂發懸門放之出王聞其事嘉之尋授兩浙副大使天祐三年九月唐哀帝選傳瑛尚壽昌公主勅武肅王曰金章貴第方膺下嫁之榮齊家大邦始稱和鳴之兆先帝與卿素同盟約誓掃寇讐雖崇資厚祿酬勲已極於當時而懿戚周親結分

思聯於奕世尋期愛女欲配高門三邊未息於戎機百

兩遂稽於宿諾願遵先旨特舉令儀况傳瑛驪領奇光

鳳毛異彩不俟折筭之訓已當壓鈕之祥媯汭名門雅

稱大姬之匹張敖顯族宜承元女之姻是用先降徽章

特加異數今授傳瑛大同軍節度使檢校太傅同中書

門下平章事駙馬都尉兼加食邑八百戶公主未及降

而卒

備史作開平三年梁選王子兩浙副使傳瑛為駙馬都尉似誤

傳瑛夢與公主語

因得鬼疾久之將兵攻常州無功無何卒年三十六贈

太尉一作太師封雲國公

元懿字秉徽初名傳璫已又名傳懿後更今名武肅王第五子也生而燕頤起家鎮海軍右直都知兵馬使尋授安國衣錦軍防遏指揮使陞檢校兵部尚書元懿性至孝母李氏一作金氏常侍武肅王不稱旨被捶成疾疾動每經旬月元懿躬親廁踰稱藥量水夜不解帶者久之常出治睦州民間一夕輒數驚火起巫楊媪者陽為刻期曰某日某所復當火已而皆如其言元懿曰火如巫

言巫為火也命斬韞于市火遂絕天寶中自睦州判東陽東陽之南有神曰白砂神邑人多畏奉之歲三月必大作風雨由白砂過州城壞民廬舍無筭相傳神故龍也每歲一復東海為恠至是元懿臨其境夢朱衣來言白砂王慮震驚相國已由南山而去人咸異之元懿頗喜遊宴彫飾之事文穆王襲位禮敬尤篤元懿飲酒恒及半而傾于地王因宴致鈔鑼于元懿前諷之元懿悔悟遂稍稍改云累官賓睦二州刺史清海武勝等軍節

度使太傅同中書門下平章事進太師中書令封金華
郡王廣順元年薨于婺州年六十有六謚曰宣惠墓在
金華縣東北六里元懿治郡三十年初蒞新定時有卜
士方氏者時人號曰龜精常以卜數貽之曰太乙接天
河金華寶貝多郡侯六十六別處不經過至是其言果
驗子仁倣官婺州刺史武勝軍節度使

元瑋字德輝武肅王第六子也

一曰第四子

初名傳瑋儀狀

瑰傑風神俊邁起家沂王府咨議叅軍宣武節度判官

累遷散騎常侍賜金紫尋屬軍旅事乃改馬軍廳事指

揮使武勇都之變徐綰召淮南兵入寇顧全武謂楊公

大丈夫今以難告必閱我群公子誰可行者武肅王曰

吾常欲以傳璪昏楊氏今其時矣乃遣傳璪微服為全

武僕詣廣陵比及望亭有逆旅媪輒識之至潤州團練

使安仁義亦知其非常

或云愛其清麗

將以其下十人相易全

武昭闇吏宵遁乃得脫已而見吳王行密傳璪指陳逆

順之理吳王為之動容嘆曰此龍種也生子當如錢郎

吾子真狔犬耳遂以女妻之即日召田頔還君未幾逆婦歸錢塘累征縉雲睦州皆陷陣有功授邵州刺史復征湖州高澧及攻東洲授睦州刺史尋遷蘇州累勅授中吳建武等軍節度使蘇常潤等州團練使太傅同中書門下平章事文穆王立更初名諸兄弟盡易傳為元而傅璪亦以元璪名元璪在蘇州三十年性儉約而恭靖便弓馬文穆王時以王兄尤加禮遇初璪自姑蘇入覲王以家人禮事元璪親奉觴為壽曰此兄位而小子

居之凡之賜也元璪俯伏曰大王功德高茂先王擇賢而立至公也君臣位定惟知恭順而已因相顧感泣進檢校太師中書令開府儀同三司作金谷園以娛老又建烟雨樓于滌湖之上久之晉勅封廣陵郡王封不及受命而薨宣旨于柩前時天福七年三月也年五十六莫以王禮謚曰宣義子文奉文炳

文奉字廉卿廣陵王第二子精騎射能上馬運槊涉獵經史音律圍緯醫藥鞠擊皆冠絕一時以廕為中吳軍

牙內都指揮使改節度副使幾三十年天福中嗣元瑒
為節度使累加至檢校太尉兼中書令文奉于郡中建
南園東莊九國志謂
之東墅為吳中之勝竒卉異木及其身見

皆成合抱又累土為山亦成岩谷延接兵旅任其所適
自號曰知常子飲酒兼數人時時乘白騾披鶴氅緩步
花徑或汎舟池中遠近聞賓客笑語聲則就飲為樂所
聚圖籍古器無筭雅有鑒裁一時名士多依之而禪流
法齊輩亦藉以取給焉時有丁陳范謝四人

丁守節陳
贊明范夢

崇禮 皆廣陵王客也文奉署為節度推官先是元璩夢

登烏鵲橋見禽獸充牣旁人云此二郎祿料也又文奉

常叩祿命于天台僧德韶德韶云明公已巳八十一至

開寶二年已巳歲八月十一日卒其言始驗謚曰威

文炳廣陵王第闕子也開寶初文炳嘗葬妻丘于報恩

寺側發古墓得丈夫遺骸長丈許東列銅鐺西有寶劍

玉環文炳方取劍會黑蜂遽螫之暴卒子知玄號擗昏

眩久之始蘇自言丈夫稱是帝堯之臣繇余氏佐禹治

水以功封吳獲奠于茲若父奈何發吾版石奪吾玉槨
今雖擊死方隸吾籍其勿悼念好事者比于貳負之臣
之尸多傳其事焉

傳瓘武肅王第八子母濟南夫人童氏傳瓘性仁厚明
敏好學治郡大得政體累授鎮東軍親巡都指揮土客
諸軍安撫使光祿大夫賓州刺史進金吾衛大將軍員
外置同正員檢校司空改明州刺史封餘姚侯寶大元
年卒年三十傳瓘在東府時酷好植牡丹成叢列樹者

顏色葩芳率皆絕異人號為花精

海錄碎事又云忠懿王從兄仁傑酷好種

花人號為花精未詳是非

子仁俊

仁俊警敏有智畧文穆王繼立諸將多恃強詣府請誅劉仁杞等王命仁俊宣教音詞弘亮意旨曉暢諸將皆懼服去王以為仁俊能大奇之及元球元珣獲罪于王王欲按將吏與交通者株連未已仁俊諫曰昔光武克王郎曹公破袁紹皆焚其書疏以安反側今宜效之由是中外得以帖然忠獻王時仁俊為內外馬步都統軍

使而仁俊母故杜昭達之姑也富人程昭悅者以私憾
誣闕璠與昭達謀奉仁俊為亂王于是殺璠昭達而奪
仁俊官幽之東府昭悅復收仁俊故吏慎溫其使證仁
俊之罪每上彭時五毒備至溫其堅守不屈王嘉溫其
節擢為顯職未幾昭悅伏誅釋仁俊之囚廣順元年忠
懿王以仁俊無罪復其官爵歷仕威武軍節度使檢校
太保卒謚安簡

傅球武肅王子也當武勇都之變傅球年尚幼淮南將

田頌徵質子于我王欲遣以行傳球不可王怒將殺之
及事平王奪其內牙兵印後封大彭縣侯

扶南侯元球淮陰侯元珣皆武肅王子也元珣以順化

節度使同平章事判明州

按舊五代史長興三年昇楚州為順化軍以明州刺史錢

元珣為本州節度使楚州時屬揚州元珣蓋鎮明州而領楚州節也

驕恣不法文穆王廢

為庶人幽之別室而元球為武肅王愛子數有軍功且

賜以兵仗累官土客馬步都指揮使靜江節度使兼中

書令文穆王時恃恩驕橫增益軍馬頗不平于王王使

人諷元球請輸還兵仗出判温州元球未之許也于是
銅官廟吏承王指密告元休遣親信禱神求為吳越主
又為蠟書從水竇出入與元珣謀議圖危社稷文穆王
遂馳騎召元球宴宮中至則左右陽稱元球有刃墜于
懷謀為不測即格殺之并殺元珣

按晉高祖實錄十國紀年作元球元珣以

罪誅今從吳越備
史九國志作元球

傳璠

一作璠

武肅王第十四子也起家鎮海節度右押牙

充上直都知兵馬使檢校尚書左僕射已而出為湖州

刺史進太傅封新安侯天寶十四年娶楚武穆王女馬氏未幾傅璠死馬氏奮不欲生天福中南漢主命侍郎盧膺偕楚使歐陽練來逆馬氏為繼室蓋漢主后故馬氏女兄也至是欲續舊姻楚文昭王實內主之馬氏涕泗迸至誓不再適遂終其身于吳越

傅璟武肅王第十五子初授湖州刺史唐天祐四年哀帝選為駙馬勅武肅王曰卿功高鼎鉉爵極土茅光紀年繫月之書等巢閣負圖之瑞朕自惟寡薄猥荷基扃

惟於舊勲敢墜先志所以再謀選尚用洽姻親男傅璟
學禮聞詩資忠履孝前代則何郎風貌克著嘉名近朝
則郭令功崇爰推爰子既臻具羨湏降明恩俾升右揆
之榮兼正九卿之秩奉車增貴鳴玉趨朝騁騏驥之修
途契鳳凰之吉兆眷戀之外慰沃良深今授傅璟檢校
尚書右僕射守司農卿駙馬都尉傅璟後封雲國公
元琳武肅王第二十三子歷官右千牛衛大將軍

今慈
溪錢

氏其苗

裔也

元瓚武肅王第二十八子少強直好詩學武及長從征
有功歷官至知福州彰武軍事號令嚴明麾下無有敢
犯者元瓚處兄弟不疑侍文穆及忠懿諸王皆盡臣禮
由是上下卒用和睦建隆六年卒年六十有七追封寧
明王

元弼亦武肅王子也文穆王初置秀州以元弼為刺史
元弼蒞政有方用最課名一時武肅王親子三十八人
見于史傳者文穆王暨元璣諸王子外又有永嘉侯傅

璲金華侯傅琇錢塘侯傅琰而失其封爵者則有駙馬
都尉傅玠靜海軍節度使元祐及元璉元玠元琢元璞
元璫元珣元璠元瑾元裕元璫元勗元禧凡得三
十三人而寶正長興時又有温州刺史元邗元珪未詳

其所出云

按陶九成輟耕錄云吾鄉錢叔璠贊乃武肅王諸孫也常示所藏鐵券形宛如瓦高尺餘

濶二尺許券辭黃金商嵌一角有斧痕蓋至元丙子天兵南兵其家竊負而逃死于難券亦莫知所在越再丙子漁者網得之乃在黃岩州澤庫深水內漁意寶物試斧擊之則鐵焉有報子叔璠兄者用十斛穀易得又七修類藁云明太祖下禮官議鐵券之制有奏唐和陵時賜錢鏐者其孫尚藏因取為式武肅之裔在台州者未

審幾族姑
附錄于此

文穆王子孝獻世子弘傳

瓊山侯弘僕

弘儼

吳興郡王弘堪

弘億

彭城侯弘儀

弘偓

弘侑

儼

孝獻世子弘傳文穆王第五子也與忠遜王同出魯國
夫人鄜氏初梁沙門寶誌銅碑記云有真人在冀州開

口張弓左右邊子子孫孫萬萬年自從南唐以弘冀名
子而文穆王諸子皆連弘字以應之弘傳所由名也王
年四十冢嗣未建及弘傳生特為鍾愛累奏授兩浙副
大使果州團練使檢校太尉國建立為世子先是王治
世子府謠言曰何處有鹿脯及將歿又有人題所居屏
障曰四月二十九日大會群仙凡署字數處天福五年
果以病薨年十六歲追謚曰孝獻葬錢塘天竺之前山

楓林

塢 旋改世子府為瑤臺院

九國志太平興國中宋以錢俶為慎瑞師三州觀察

使蓋倬常為僧復好睦故戲之也疑倬亦文穆王諸子

弘僕文穆王長子歷任靜海軍節度使温州刺史封瓊山侯卒文穆王子十四人弘僕以下次弘儼次弘侑次弘佖次孝獻世子次忠獻王次忠遜王次弘僊次忠懿王次弘億次弘儀次弘偃次弘仰次儼即弘信而弘侑則又其養子也

弘儼字智仁文穆王第二子本名弘偁性喜簡儉善騎射能書有文而自晦筮仕上直副兵馬使檢校尚書右

僕射年二十餘遷東府安撫使洞曉政術吏不敢欺文
穆王嘉之賜金酒器一副因命兼領睦州時福州初歸
附將校有讐隙者率多相誣弘儼謂左右曰人各有憾
誣構一啟疑懼交至豈國家推心懷遠之道邪悉置不
問尋為靜海軍節度使判軍州事均徭役罷淫祀盡放
所畜聲伎每食不過鮑魚菘菜顯德中常入覲西府永
嘉人謂其將代也卧轍阻之弘儼先以籃輿載侍妾出
衆疑弘儼在中遽擁而迴其為民所感悅如此久之改

彰武軍節度使知福州事溫人皆行啼巷哭曰願公早

回亦有携家以從者謂之隨使百姓

亦曰隨使戶

承制累授

太尉拜丞相乾德四年卒于閩神樞經溫州歸會稽三

州之民為號踊者甚衆終年五十有四謚節惠弘儼有

弟弘闕文穆王第三子也封西安侯居衣錦軍者多其

後

又弘按官至秀州刺史工于畫抗或言亦文穆王養子云見圖繪寶鑑

弘堪字惠達文穆王第八子也母陳氏起家內牙諸軍

都知兵馬使檢校司空年十八出為湖州刺史有妖巫

登衙門大樹恣為鬼神語州人驚畏弘堪曰妖由人興
命注弩而射巫果乞命因扶之百投于境外一州大服
弘堪明吏術能為詩頗有奇句忠懿王嗣位恭敬尤篤
顯德間工城灾悉以器用服玩上之累奏授特進檢校
太尉宣德軍節度使封吳興郡王建隆初宋勅授同中
書門下平章事尋以飲酒過度薨年三十八謚曰恭義
忠懿王哭之慟撫弘堪諸子恩禮有加先是大星墮于
西北月餘而弘堪逝焉

弘億字延世文穆王第十子母沈氏初孕文穆王夢僧
入寢帳已而生弘億故小字曰和尚天資俊拔善屬文
年二十官內牙諸軍左右都虞候檢校左僕射開運間
興師救福州忠獻王欲鑄鐵錢以益將士祿弘億諫曰
鑄錢有八害新錢既行舊錢皆流入鄰國一也可用於
吾國而不可用于他國則商賈不行百貨不通二也銅
禁至嚴民猶盜鑄况家有鎡斧野有鋤犂犯法必多三
也閩人鑄鐵錢而亂亡不足為法四也國用幸豐自示

空乏五也祿賜有常無故益之以啟無厭之心六也法
變而弊不可遽復七也錢者國姓易之不祥八也王善
其言而止未幾為忠懿王丞相會內牙指揮使斜滔謀
亂辭連弘億左右勸王窮其事王以弘億故不欲顯治
貶滔處州而出弘億為明州刺史弘億居明州頗著善
政凡一切科率舊制悉除之顯德中王命括民丁以益
軍旅州縣長吏因之多所殘刻弘億手疏其弊辭理切
直王感悟乃罷王常與丞相以下論民之勞逸都由人

君奢儉裁詩二章以寓志弘億亦謂北方侯伯多貢淫

巧蠱君心因獻詩風刺王嘉歎久之仍賜詩褒美弘億

女故常字王舅吳氏子者也已而諸吳驕縱日甚弘億

遂絕不與通人咸稱其強正焉建隆初升奉國軍節度

使檢校太保以名犯宋宣祖諱改名億末年夢金甲神

告其死期因署壁曰奉國節度使只年三十九大會賓

客飲酒與之訣卧疾三日而終謚曰康獻

順存錄杭州志俱作忠獻

弘儀文穆王第十一子建隆初避宋諱改名儀起家鎮

東軍安撫使乾德時奏授越州觀察使歲旱租不登儀以私財八百代賦越民無不德之故再任幾三十年所深信內典在越多營佛事與雲門僧重曜交相得宋太宗即位加金紫光祿大夫檢校太保封開國彭城侯忠懿王入朝儀自東府至太宗詔改慎瑞師三州觀察使已又改金州觀察使太平興國四年卒于京師之賜第年四十八贈安化軍節度使葬京城東之臨汴鄉邊公原儀工草書善奕碁皆及上品曉音律能造新聲尤工

琵琶妙絕當世忠懿王常宴集兄弟欲使儀彈而難于
而命乃別設一榻置七寶琵琶于上覆以黃錦酒酣儀
果白王曰此非忽雷乎願奏一曲為王壽時王叔元璫
亦知音王命之拍曲終王大悅賜儀北綾五千段元璫
錢千緡當時以為美談儀終之歲重曜夢儀被天人服
乘雲而至曰弟子已生天矣重曜寤貽書具述其夢且
云觀公之操履雅叶斯兆然世祿無幾願益進修函未
達而儀已逝焉後十年墓為盜所發貌如生人故吏吳

玄素昇柩還越莫于秦望山重曜之塔側妻何氏累封
廬江夫人

弘偓字贊堯文穆王第十二子也性仁孝事母陳氏以
恭勤聞及任衢州刺史為政寬恕厚重民多愛之時屬
歲旱部民將逐食他州不忍輒去共詣聽事告白而行
弘偓為之流涕忠懿王立友愛甚至顯德五年卒中外
無不歎惜終年二十五子昭度字九齡仕至供奉官俊
敏工為詩多警句有集十卷行于世

弘仰文穆王第十三子母周氏弘仰善騎射通儒術尤精書法累官台州刺史性雖嚴急而政事寬簡吏民畏服顯德五年二月卒年二十有四謚曰成顯子昭序字著明好學喜聚書多親寫入宋知通利軍以勤幹聞

儼字誠允文穆王第十四子忠懿王異母弟也本名弘信後又去弘名信宋淳化初改今名焉儼生之夕母崔夫人合瞑時見一僧坐帳前既寤彷彿如覩乃生儼文穆王喜命鑄金銀大錢為洗兒具甫及周晬府中籤鑰

字一見即能記憶文穆王大漸時儼在別院忽驚啼謂
食母曰適夢白髮翁呼我速詣王所因大號泣言未卒
而訃聞矣儼幼年為沙門及長謹慎好學雖祈寒溽暑
未嘗暫輟圖籍忠懿王襲國命領鎮東軍安撫副使顯
德四年奏署衢州刺史已又知婺州武勝軍事晉光祿
大夫封開國伯宋太祖平揚州遣儼入賀太祖命閤門
副使武懷節賫詔迎勞及歸賜玉帶名馬錦綵器皿開
寶三年代兄偓知湖州充宣德軍安撫使忠懿王攻常

州命儼督漕運太平興國二年隨忠懿王朝宋侍祠郊
宮詔儼班列于節鎮下太宗常幸天駟監賜從臣馬勅
主者曰錢儼儒者宜擇馴馬給之累授新媯儒州觀察
使仍知湖州又為隨州觀察使頃之代兄儀為金州觀
察使出判和州真宗嗣位加檢校太傅累階至特進在
職十七年咸平六年卒年六十七贈昭化軍節度使謚
曰靜宣墓和州子昭慈亦有文名儼博涉多聞少夢人
遺以大硯自是文辭敏達富贍當時國內文章向推羅

隱崔仁冀而儼能與之頡頏太宗朝常獻皇猷錄咸平
時又獻光聖錄所著有前集五十卷後集二十四卷吳
越備史遺事忠獻王勲業志錢氏戊申英政錄若干卷
又作貴溪叟自序傳一卷善飲酒百卮不醉居外郡常
患無敵或言一軍校差可倫擬儼問其狀曰飲益多手
益恭儼曰此亦變常非善飲也儼鎮湖州時後圃芙蓉
枝上穿黃玉玦一枚枝梢交雜不知從何而貫儼截榦
取玦以獻人謂真仙來遊留此以驚世者亦異事云

忠獻王子富水侯昱

西平侯郁

忠遜王子昆

易

忠懿王子世子惟濬

彭城郡王惟治

英國公惟演

惟濟

昱字就之忠獻王長子也忠獻王薨昱在襁褓間國人立忠遜王遂以昱為咸寧大安二宮使忠懿王嗣位承制授秀州刺史宋太祖御極昱入貢與江南使同侍宴射于後苑江南使先中的令昱解之應弦而中賜以玉

帶

錢氏家乘云太祖命太宗于中南府置宴習射後苑太宗中的昱亦中的太宗解玉帶賜之今從宋史

及宋平蜀昱復入賀歸為台州刺史領德化軍節度使

唐僖宗光啟三年升台州為德化軍

本路安撫使俄領靜海軍節度使温

州刺史轉彰武軍節度使宋師討江南昱為東面水陸

行營應援使從忠懿王朝宋授白州刺史昱上太平興

國錄一卷求換臺省官太宗賞其才詔學士院試麻制

三篇荅高麗書一道除秘書監判尚書都省時新葺省

署昱撰記奏御又常以鍾王墨迹八卷為獻有詔褒美

又聞昱善書令進筆札賜御書金花扇二急就章一御

翰三十軸出知宋州改工部侍郎歷典壽泗宿三州率

無善政至道中郊祀當進秩太宗曰昱貴家子不宜任

丞郎進郢州團練使咸平二年表入朝以病不及陛見

卒年五十七贈太師封富水侯葬開封府汴陽鄉昱與

從父儼皆以文章知名中朝比之二陸又雅善琴畫聰

明能覆碁飲酒至斗餘不亂尤好學喜聚書多所吟咏

恒與中朝卿大夫唱酬一日對沙門贊寧隸竹事迭錄

所記昱得百餘條因集為竹譜三卷生平交舊昱終日
談宴未嘗犯家諱有貳卿文稿二十卷末年貪猥縱肆
無名節可稱子百人涉登雍熙進士第絳至內殿承制
累典郡頗以幹力稱

郁忠獻王第二子累官鎮東軍節度副使秀州刺史入
宋改知全州至太保卒追封西平侯忠獻王群從中又
有仁熙者頗讀書能丹青尤工水牛多寫于紈扇上錢
氏子弟俱擅文采逸興豪舉常取雪上瓜各言子之的

數言定剖視負者張宴謂之瓜戰至今傳為雅謔

昆字裕之忠遜王子也歸宋登進士第累遷至三司度
支判官歷知七州治尚寬簡以秘書監致仕卒年七十
六昆善為詩賦又工草隸有文集十卷性嗜蠊常求補
外職曰但得有蠊無通判處足慰素願也

昆又工畫常
繪寒蘆沙鳥

于國扇人
腕寶之

易字希白忠遜王子忠懿王入宋群從悉補官易與兄
昆不見錄遂刻志讀書年十七舉進士試崇政殿三篇

日未中而就言者惡其輕俊罷之再舉進士府試第二
自謂當第一乃上書言試朽索之馭六馬賦意涉譏諷
真宗降為第二補濠州團練推官改光祿寺丞時惟演
叅台席寶易為草制朝廷以為美談未幾擢知制誥判
登聞鼓院卒年五十九易才學敏贍數千百言援筆立
就又善尋尺大書行草善觀佛書檢道藏有金閨瀛州
西垣制集一百五十卷青雲總錄青雲新錄南部新書
洞微志一百三十卷

世子惟濬字禹川忠懿王嫡子也顯德二年惟濬生即稱世子表授鎮海鎮東兩軍節度副大使檢校太保鈐轄兩浙管内土客諸軍事建隆七年加檢校太傅三年領建武軍節度使乾德初加檢校太尉是年冬朝宋六年復朝宋侍郊祀開寶二年充鎮東等軍節度浙江東西道觀察處置兩浙制置營田發運等使未幾朝京師宋太祖召宴苑中令黃門奏簫韶樂與諸王同席坐賜玉帶珠綴衣水精勒御馬四年又朝宋寵待有加宋兵

征江南惟濬從忠懿王下常州以功加同平章事太宗
即位加兼侍中太平興國二年丁母妃憂起復加鎮東
大將軍右金吾衛大將軍員外置同正忠懿王將入朝
惟濬先貢方物太宗召戶部郎中侯涉至泗州迎勞之
三年忠懿王獻地改封惟濬亦徙淮南節度使用郊祀
恩加檢校太師從平太原征幽薊已又隨幸大名雍熙
中歷鎮安州端拱初宋太宗藉田封蕭國公忠懿王薨
起復加兼中書令惟濬與諸王子共進上綾羅犀玉帶

笏犀角象牙丁香馬腦鞍勒金玉珠翠首飾器皿凡數

十萬計又進女樂十人太宗不納各賜錦綵三十段遣

還淳化初杭州上武肅諸王唐梁以來累朝所賜玉冊

竹冊各三副鐵券一詔誥百餘函太宗詔還惟濬未幾

暴卒年三十七追封邠王

備史表
作邠王

謚曰安僖葬汴京之

南惟濬輕財好予頗酒于酒故不享遐年焉子守吉守

讓守吉官宋西京作坊使守讓字希仲累任至宋東染院

使頗勤學有文集二十卷子恕娶曹王元偁女長安縣主

惟治字世和本忠遜王長子忠遜王初遷于東府而
惟治生忠懿王酷愛之養為己子幼好讀書八歲授
兩浙牙內諸軍指揮使判軍糧營田事又改德化軍使
遷檢校太保台州團練使乾德四年宋制授寧遠軍節
度使檢校太尉仍兼牙職與世子惟濬節旄同日至國
人榮之宋師伐江南惟治從忠懿王朝宋命惟治權發遣軍國事
改奉國軍節度使忠懿王朝宋命惟治權發遣軍國事
王還令惟治入貢惟治私獻塗金銀香獅子香鹿鳳鶴

孔雀寶裝髻合釦金甃器萬事吳繚綾千匹辭日宋太祖賜襲衣玉帶塗金鞍勒馬金銀器繒綵踰萬計太宗嗣位進檢校太尉忠懿王再入覲又權國事會廐中火惟治率兵臨高下視令親信十數革仗劍申令敢後顧者斬頃之火息妻族有隸帳下者恃親犯法命杖背于府門王既納土宋命考功郎中范旻知杭州惟治奉兵民圖籍帑廩管籥授旻與其弟惟渲惟灝歸宋改領鎮國軍節度使惟治草隸擅絕尤好二王書每曰心能御

手手能御筆則法在其中矣常以鍾繇王羲之唐玄宗
墨跡凡七軸裝潢為獻太宗常與翰林賀正顯評惟治
書曰諸錢皆效浙僧亞棲之蹟故筆無骨獨惟治工耳
雍熙三年太宗大舉征幽州命惟治知真定府兼兵馬
都部署前一日曲宴內殿惟治獻詩太宗覽之悅酒半
遣小黃門密諭北面之寄至則訓兵享士頗勤政務初
惟濬雖忠懿王嫡嗣然以其放蕩無檢故王雅器惟治
一夕忠懿王暴疾王妃悉斂符鑰付之及王薨起復檢

校太師累上表請罷節鎮不許後坐心病家事不肅而
僮奴以姦私殺人于廷真宗為停按鞠止貶右監門衛
上將軍晚年資用頗竭真宗憐其貧特轉右武衛上將
軍月給奉十萬累加左驍衛上將軍左神武統軍卒年
六十六贈太師追封彭城郡王葬洛縣邙山先王之塋
惟治好學家聚法帖圖書萬餘卷多異本生平慕皮陸
為詩有集十卷又有寶子垂綬連環詩

昶文詩也寶子即香爐

世

多稱之書跡恒為人藏弃娶祁國夫人元氏再娶瑯琊

郡夫人水丘氏子丕幼篤學仕宋終光祿少卿惟治初鎮明州夢神人披甲謂曰我西嶽神公面有缺文即捧土填之後遂領華州節鉞二十年

惟演字希聖忠懿王次子歸宋歷右神武將軍博學能文召試學士院以笏起草立就真宗稱善歷翰林學士工部侍郎樞密副使會靈觀使兼太子賓客更領祥源觀晉秩工部尚書仁宗立進兵部尚書未幾以太后姻家罷為保大軍節度使知河陽踰年請入朝加中書門

下同平章事判許州冀朝廷復用留滯京師為臺臣奏
劾乃亟去天聖初改武勝軍節度使明年來朝上言先
隴在洛陽願守宮鑰即以判河南府再改泰寧軍節度
使惟演雅意柄用抑鬱不得志及仁宗耕籍田求侍祠
因留為景靈宮使太后崩落平章事為崇信軍節度使
居無何特贈侍中追封英國公太常張瓌請謚文墨已
乃改文僖其本末多詳宋史茲不具錄惟演文辭清麗
名與楊億劉筠相上下於書無所不讀家儲文籍侷秘

府尤喜獎厲後進所著典懿集三十卷又著金坡遺事
飛白書叙錄逢辰錄奉藩書事若干卷常曰吾平生不
足者惟不得于黃紙上押字爾蓋未常歷中書也子暖
晦暄從弟易易子彥遠明逸父子兄弟相繼以制策登
科為錢氏一時之盛

惟濟字巖夫忠懿王第六子

錢氏家乘
云第八子

生七歲王徙封

漢南奏補本府元從指揮使歷諸衛將軍領恩州刺史
改東染院使真拜封州刺史嗣後請試郡宋真宗命知

絳州民有植條桑者盜奪桑不能得乃自創其臂誣桑
主欲殺人久繫不能辨惟濟取盜與之食視之盜以左
手舉匕箸惟濟曰以右手創人者上重下輕今汝創特
下重正用左手傷右臂非爾自為之邪盜乃服誣妄罪
未幾遷永州團練使改知成德軍仁宗時加檢校司空
民有偽作白金質取緡錢者其家來告惟濟曰第奪言
被盜示以重購質者當來責餘直即得之矣已而果然
杖死之改吉州防禦使除虔州觀察使旋知定州升武

昌軍節度觀察留後惟濟喜賓客豐宴犒家無餘貲所
負公使錢至七百餘萬卒贈平江軍節度使謚曰宣惠
賜賻錢三百萬絹千匹所著有玉季集二十卷惟濟多
吏才而性苛忍所至牽蔓滿獄重囚棄市或至斷手足
探肝膽以為常知定州時有婦人待前妻子不仁至燒
銅錢灼臂惟濟命取所生兒置雪中械婦人往視兒死
其慘毒多此類忠獻忠懿二王親從子凡六十八人今
見傳記者不過十餘人他不可得而詳也

安國縣法華院有僧賜號

普照大師傳為錢王第十
九子疑即忠懿王子云

十國春秋卷八十三

欽定四庫全書薈要卷八千六百五十

十國春秋卷八十四

檢討吳任臣撰

吳越八

列傳

羅隱

羅隱字昭諫新城人也後改新城為新登亦為新登縣人祖知微唐福唐縣令父修古應開元禮隱本名橫貌寢陋凡十上不中第遂更今名少能詩與族人虬鄴齊

稱時人謂之三羅初寓池州梅根浦刺史竇滂營墅居之因自號江東生尋為唐相鄭畋李蔚所知卧病長安會天旱詔大京兆祈雨作法隱上䟽切諫詞涉規諷竟

不用

疏畧曰夏五月京畿旱癸巳日聞詔大京兆用器水盞香蒲蕭絳幡葦致于坊市門將所以用舊法

而名兩也臣聞水旱與天地同出苟時或然不可以倉卒除去今秦地旱已逾月矣而陛下禱祠亦以頻矣天之高地之厚五嶽之綿亘四瀆之宏遠陛下命百執事啟其外何嘗不以心祝之雖莖槁苗乾而百姓不怨嗟者其感陛下之誠深也今以蒲蕭葦為請者豈陛下以其靈于嶽瀆者乎夫嶽瀆視陛下之公輔裂陛下之土田苟陛下憂則嶽瀆亦宜憂矣受祭據封者尚未能為陛下出力彼蒲蕭復何足以動天臣為陛下不取也

已而遇羅尊者以相術勸隱曰君志在一第官不過簿

尉耳若能罷舉東歸霸國富貴必矣隱由是從事湖南

歷淮潤諸鎮復多齟齬不合

隱與顧雲等謁淮南高駢
隱見駢酷好仙術潛題后

土廟刺之連夕挂帆而返巫者告駢駢怒發急
棹追之不及後駢遇害隱著妖亂志以非之

是時招

討使宋威征賊不時進隱詣軍門上書言王仙芝尚君

長等凌突我廬壽煇剝我梁宋天子因處分十二州取

將軍為節度非方鎮之無帥非朝廷之乏主蓋以將軍

跳出隴右不二十餘年三擁節旄謂將軍必能知恩用

命耳今聞群盜已拔睢陽二城大梁亦板築自固彼望
將軍猶沸之待沃壓之待起也而將軍朱輪大旆優游
東道不知朝廷以八十三州奉將軍侍衛者乎抑將俾
將軍旦夕剪此草寇也威得書甚病其言久之歸杭州
謁武肅王懼王不納乃以所為夏口詩標卷首

中有一箇稱衛

容不得思量黃祖漫英雄句

王覽詩大笑加殊遇貽以書曰仲宣遠

託劉荊州都緣亂世夫子辟為魯司寇只為故鄉隱曰
是不可去矣武肅王初授鎮海節度使令沈崧草謝表

盛言浙西繁富成以示隱隱曰今浙西兵火之餘日不暇給朝廷執政方切于賄賂此表入奏執政豈無意要求邪廼請更其畧曰天寒而麋鹿常遊日暮而牛羊不下朝廷見之曰必羅隱辭也及昭宗易名曄隱為賀表云左則虞舜之全文右則姬昌之半字京師稱為第一梁既篡唐欲以虛爵糜強藩進武肅王吳越兩國且以諫議大夫召隱隱不行請舉兵討梁曰王唐臣義當稱戈北嚮縱無成功猶可退保抗越自為東帝奈何交臂

事賊為終古羞乎王始以隱不遇于唐有舛望心及聞其言雖不能用而心竊義之王待隱日隆時西湖日納魚數斤號使宅魚會王召隱題礮溪垂釣圖隱借詩寓意遽蠲其征

詩曰呂望當年展廟謨直鈎鈎國更何如若教生在西湖上也是須供使宅魚又

一日寢疾王親臨撫問因題詩于壁

詩云黃河信有澄清日後代應難繼

此才隱為續末二句幕紅紗于上以誌恩遇焉隱性不喜

軍旅而料事多中初武肅王城西府命賓寮巡覽顧謂左右曰百步一敵樓足言金湯之固隱徐曰敵樓不若

內向為佳及武勇都之變援兵多自外攻內人皆以為

先見

世傳隱出語成讖閩中書筒灘玉髻峯皆留異迹而黃滔贈隱詩亦云三微不起時賢議九轉丹成

道者累官錢塘縣令授鎮海軍掌書記節度判官監鐵

發運副使除著作佐郎司勳郎中歷遷諫議大夫給事

中發運使賜金紫天寶三年十一月卒年七十有七葬

新登縣界沈崧誌其墓

任臣案研北禱志謝皇父常至新城聞故老言羅隱給事家在

縣界徐村之水鵠冢碣猶存梁開平四年沈崧志又錢塘縣志云隱墓在定山鄉居山里紹興府志云隱寓居蕭山卒墓在許賢鄉一統志云隱墓在涇縣東七十里江西通志曰羅隱墳在樂安縣羅家潭所說不同未詳

是孰隱為文章多氣力而性傲睨嘗值韋貽範于舟次素

昧生平隱直呼舟子曰是何朝官我脚間夾筆可敵得

數輩貽範慚恨卒以此沮之又作詩文及謔語常涉刺

譏顧雲依淮南高駢隱譏之夏飲于海風亭雲曰青蠅

被扇扇離席隱遽曰白澤遭釘釘在門隱在浙幕沈

崧得新榜示隱隱題其末曰霸陵老将無功業猶憶當

時夜獵歸又貽宗欲以甲科處隱有大臣舉隱華清宮

詩云也知道德勝堯舜爭有吳越掌記集三卷江南甲

奈楊妃解笑何其事遂寢

乙集十卷江東後集三卷湘南應用三卷靈璧子兩同

書十篇又有讒書五卷淮海寓言七卷多散失不傳先

是隱適魏謁鄴王羅紹威將入境先寓書叙家世以紹
威為從子行莫府吏皆怒曰隱一布衣而姪視大王可
乎紹威素重士且曰隱名振天下王公大人多為所薄
今惠然肯顧得為從子幸矣遂擁旆郊迎執禮甚恭隱
亦不讓比行贈錢百萬仍以書抵武肅王稱為季父

紹威

喜學隱詩號其
文曰偷江東集

而青州王師範亦嘗遣信賫禮幣求詩

及得隱詩大喜又令狐湏登進士隱賀以短章湏父綯
曰吾不喜兒得第喜得羅公一篇耳其取重當世有如

此唐末時新城鼉江恒有二氣亘江上晝夜不滅至隱
與杜建徽生二氣不復見識者以為文武秀氣焉子塞
翁官鎮海節度推官善繪羊超絕妙于一時

論曰語云士用則為虎不用則為鼠豈不信哉方隱屢
躋進士第徧歷諸州馳驅擾攘之中億矣及遭逢霸主
文采爛然聲施後世可不謂得時而駕邪雖然以彼義
形于色勸興兵伐無道梁貌賦強藩畜以從子大義侃
侃又寧獨以文士見哉

顧全武

杜稜

成及

馬綽

阮結

顧全武餘姚人也從武肅王為親校與杜稜阮結等常侍左右久之授武勇都知兵馬使董昌作亂昌將徐淑會淮南將魏約共圍嘉興全武將兵往救破烏墩光福二寨有功還守西陵以遏淮南安仁義之師已而敗昌將湯舊于石城復攻餘杭擒昌將徐章又降袁邠圍越州昌嬰城自守遂去帝號會蘇州陷成及為淮南所鹵

武肅王急徵全武趣西陵使備淮南全武曰越州賊之

根本奈何垂克而棄之請先取越後復姑蘇為便而是

時昌有兄子真者驍勇善戰全武攻之逾年不能下真

與其裨將刺羽有隙羽譖殺真昌兵乃敗全武執昌殺

之是役也先登陷陣設伏捕鹵圍城降敵全武之功為

多明年全武復由海道至嘉興破淮南十八營鹵淮南

將魏約頃之拔松江破無錫連取常熟華亭逐海寇王

騰時騰據華亭已又攻蘇州走臺濛敗周本所向無敵遂克

蘇州陷崑山降其將秦裴裴之守崑山也全武帥萬人圍之裴屢出戰使弱者披甲執矛壯者彀弓弩全武每為之却至是勢迫降武肅王命設千人饌為餉裴出羸兵不滿百人王怒曰軍弱如此何敢久拒對曰裴義不負揚公今力屈而降非心降也全武力勸王宥之時人頗稱其長厚天復元年有傳武肅王為盜所殺吳王遣李神福帥師取杭州全武列八寨以待而神福與全武相持久縱杭俘使出入卧内陽謂諸將曰杭兵尚強我

師且當夜還抗俘走告全武全武不意其詐也薄暮神
福故令羸兵先行而使都將呂師造伏兵于青山下神
福親殿其後全武素輕神福引兵追之伏發為神福所
擒王聞之驚泣曰喪我良將會明年吳以秦裴故遣全
武來易全武由是得歸國而武勇都之變作初徐綰叛
王使全武備東府全武曰東府不足慮可慮者淮南耳
綰急必召淮兵至患不細矣楊公大丈夫今以難告必
閔我王以為然全武曰獨行事不必濟擇諸公子可與

俱行者王曰吾常欲以傳璚昏揚女迺使隨全武如廣陵縮果召田頔于宣州全武等至廣陵吳王以女妻傳璚趣徵頔頔怏怏而還是時微全武力為聯姻楊氏抗越幾殆未幾陳詢叛睦州淮南遣陶雅助兵全武時為指揮使復與王球共禦雅失利居數年卒先是全武建宅越地畢工之際梁棟戶牖皆出水竟不得入居而死時人謂之宅泣或言全武少落魄無行常髡髮為沙門故左右以僧為諱當圍崑山日全武檄秦裴降裴封函

納款全武大喜亟召諸將發函則佛經一卷全武大慙
曰裴不憂死乃戲我乎由是攻益急引水灌城而城遂
破

杜稜字騰雲新城人父仲明不仕累贈水部員外郎

方廡

杜將軍廟記曰杜自漢御史大夫延年起家迨唐胤為
永嘉太守五子分適他郡少子朋居錢塘遂為錢塘人
後有仲明仕水部
員外郎實生稜當唐乾符廣明間盜賊充斥寇掠兩

浙無虛日杭州練諸縣鄉兵討之稜時為東安都將更
號武安營與董昌徐及凌文舉等稱杭州八都推昌為

長而以武肅王副之武肅王功業日盛僖宗拜為杭州
刺史稜謂諸子曰吾每責人不過十罰則為之傷心觀
錢公每有斬決皆談笑自若成大事者必此人也遂傾
心事之潤州牙將劉浩逐其帥周寶寶奔常州浩推薛
朗為帥武肅王命稜與成及阮結討之敗其將丁重德
趙君度一作李君睢取常州奉寶歸抗奏除稜常州制置使
稜屬其兵于諸子建思治內建徽禦外建孚則往來經
度其間皆以武藝稱焉龍紀元年宣州將田頌李友

一作

有來攻鑿穿地道甲兵俱從土中夜入稜寢室執稜于
臥榻而去已而縱之歸大順二年武肅王以淮南數侵
邊境令稜築東安城自固稜相險易度資用因山為城
環地為池越十月而訖事昭宗以武肅王領鎮海節度
使即以稜充副使乾寧二年武肅王奉命討董昌昌乞
師淮南淮南將田頔安仁義率眾攻東安稜憑城自守
會乏水穿井百尺不得泉稜默禱于神泉即湧地出是
時頔與仁義號淮南勇將樓櫓翔空矢石交迸稜隨機

拒敵日斃淮南兵于城下者無筭淮南兵百端攻之不
可下由是紫溪保城建寧靖江四鎮皆聚保東安民懷
其恩因目其井曰杜公井明年董昌伏誅改威勝軍曰
鎮東唐拜武肅王鎮海鎮東節度使進稜兩浙諸軍都
指揮使行軍司馬

一云許在鄉
建立生祠

又明年安仁義來攻婺

州武肅王命稜將兵救之仁義移兵攻睦州竟不克稜

累官潤州刺史卒

墓在
新城縣北
三里官塘之原

命立祠新城縣西

今名

杜將
軍廟

後以子建徽貴贈太師初孫儒死士卒多奔浙西

武肅王愛其驍悍以為中軍號武勇都稜諫曰狼子野心它日必為患請以士人代之王不聽及徐綰之亂命使祭稜以旌其先見建思建孚建徽後悉以功名顯建徽別有傳

成及字弘濟錢塘人祖克評唐嘉王府長史父貞唐國子博士及性篤厚為鄉里所重乾符中代聞人宇隸八都之一遂以富陽鎮稱靜

一作靖

江都將劉漢宏作亂從

武肅王討平有功俄武肅王拜團練使隨以及為副使

及與武肅王同事攻討密謀多出于及及因為子仁瓚娶王女情好甚篤會北關鎮將劉孟安有貳心即席奮劍犯王及舉繩牀蔽之得免偏將盛造旋執孟安誅死以功奏遷散騎常侍復為靜江鎮將光啟中奉命征薛朗時常州刺史丁從實具牛酒以犒浙師仍遺美女于諸將及取而斬之餘悉不納遂克常州尋平潤州奏授兵部尚書充本州防禦使龍紀二年代阮結為潤州制置使累遷檢校司空貞寧三年改蘇州刺史是時淮南

兵圍蘇州常熟鎮使陸郢巡檢郭用

一作周

與其黨趙邯

以城應弘農王揚行密邯手办其母妻子而盟城陷及倉卒被鹵弘農王聞及家所蓄惟圖書藥物大加欣賞歸署行軍司馬及拜且泣曰及百口在錢公所失蘇州不能死敢求富貴乎願以一身易百口之命引佩刀欲自殺弘農王遽執其手止之館于府舍明年淮南將士魏約等為浙所獲弘農王計留及無益遣及歸以易約為辭武肅王許之除及鎮海軍節度副使奏授司徒至

太傅武勇都之變也先是軍中以治溝洫過勞有怨言及亟請罷役不聽已而亂驟作武肅王自衣錦軍回不得入及假建王旗鼓高牙大蓋擁節先驅與徐綰等戰而王得微服進城部署軍卒大亂畧平及功居多焉武肅王性嚴急每有檢發必亟加斬以或及至雖盛怒輒為之霽容其寵遇如此累陞贊正安國功臣保大彰義等軍節度使開府儀同三司檢校太尉贈太師兼侍中卒年六十七及天寶初避梁廟諱改姓為咸

梁太祖父
烈祖名誠

子孫時仍稱本姓

馬綽餘杭人也為人惇直居恒以忠節自許初與武肅王俱事董昌昌常使王閱部伍亡其名籍王歷唱之存亡健悴都無所失綽密語王曰老子素猜忌駭公強記當必相圖乃以白牋數番陽授王若代軍籍者王感其

意深德之因以從妹歸綽

九國志云綽以女弟妻錄錄復為元瓘取綽女今從備史

註綽尋隨昌於越州昌僭號綽棄家來奔奏授諸城都

指揮使徐許之亂綽有發懸門功武肅王隨命文穆王

納綽女是為恭穆夫人綽累職鎮東軍節度副使兩浙

行軍司馬睦州刺史已又進雄武軍節度使

薛史作秦州節度使

即雄武軍也

檢校太傅同平章事天寶十一年加檢校太尉

久之卒年七十一

阮結字韜文錢塘人唐末杭州建八都結亦與為副焉
結出入武肅王左右號親校中和二年以征劉漢宏功
奏授散騎常侍光啟三年征常州又平潤州累加戶部
尚書四年充潤州制置使加刑部尚書初徐約黨三千



餘人來降結撫之失所因散香甘露寺輒為亂投結于江遂成疾而卒年四十六

論曰武肅以驍勇之資崛起草間羣策羣力一時景附若全武及者洵能擇其主已稜子濟美奕世綽女作配王家視豐沛故人膺寵為獨厚結遭悍卒之變未竟其用忠誠靡貳亦詎出諸公下焉

杜建徽

鮑君福

曹圭

屠瓌智

杜建徽字延光稜之季子也彊勇不與諸昆類常在山

墅私署軍州押牙紀于棟鄉里見焉驚聞稜稜加督責
建徽對曰大丈夫何止一軍事押牙邪始從軍無事人
志及稜歸武肅王乃以父命盡心于王累從征伐所至
輒立功軍中謂之虎子軋寧初隨討董昌被箭中左臂
建徽猶能軍無退志無何稜遷常州制置使建徽代為
武安都將會稜為淮南鹵及歸見建徽軍中嚴整無改
其制甚稱之稜將歿散家財與衆子惟授建徽一笏一作
劔曰此吾歷諸任所秉者獨汝能傳之故乞汝徐綰許

再思之亂建徽時為武安都指揮使自新城入援賊聚木將焚北門建徽悉鉤取其木燬焉賊為氣奪頃之武肅王由衣錦城歸遣建徽及馬綽王榮等分屯諸門或有勸王渡江保越州者建徽按劍叱之曰事苟不濟同死于此豈可復東渡售命于賊乎王竒其言而止天復三年睦州刺史陳詢叛詢與建徽兒女姻也王頗疑其有它志密命馬綽伺建徽意建徽曰陳氏負恩背義自貽覆敗建徽既為姻婭誼當見疑然累書敦諭皇天后

土實鑒臨之惟拔城獲書庶明此心耳已而詢親吏來
奔得建徽抵詢書皆責以大義無逆辭乃知建徽長者
王宿疑頓解賜錢一百萬緡建徽兄建思與建徽不相
能至是告變言建徽私蓄兵仗亂且不測武肅王急命
親校索之建徽方具食不顧聽使者入卧内絕無所得
王以是益加親重遷浙東營田副使常州刺史行軍司
馬為構第城南親與規畫天寶八年送王子傳珎進京
師尚梁壽春公主未幾歸進涇源節度使十六年王建

吳越國如天子制以建徽為左丞相每朝會王必以目送之曰今日忝竊一方杜丞相力也建徽歷仕四王累官國子祭酒涇源昭化諸軍節度使丞相兼中書令封鄖國公乾祐三年卒年八十有八贈太師謚曰威烈建徽子孫兄弟朱紫盈門而性尚儉素導從不過數人財物多散鄉里親族忠獻王時孫昭達為內牙都監使盛治第宅強建徽觀之曰乳臭子不諳事乃爾俄昭達果以罪誅少驍悍臨敵輒單衣入陣不介馬而馳從王弟

鏢援姑蘇與敵遇河梁斷處鞭馬徑度及岸馬斃而建
徽自若也因瘞其馬號曰馬冢至老不廢騎射常擊毬
廣場興酣有宿中箭鏃自臂中飛出時人壯之

鮑君福字慶臣唐太子少保防之裔也後遷越遂為餘
姚人祖興父爍俱不仕君福少羈貧為人沉默少言純
厚有膽畧餘姚有井而廣丈餘每恣卧其上無惧色鄉
黨異之及從軍以驍果稱初隸劉漢宏部為牙將曹娥
球之役來歸武肅王武肅王使領一軍號向明都君福

常側兜牟臂弓注束矢馬上輪雙劔如飛出入陣中望之若流電人皆呼曰鮑鬧累積戰功為衢州應援指揮使屬刺史陳璋叛淮南人入其境脅君福為郡職君福不納武肅王慮其遇害密賜帛書令姑受命以緩旦夕死終堅不肯從伺守者李元嗣醉遂馳歸尋授衢州刺史吳將周本守信州屢侵信安境君福時時率數騎往追之本即遁去天寶十一年王子傳球攻信州從斬吳將李師造擒偏將馮敏等功為諸軍之冠文穆王領

清海節度使辟為副使及將罷郡武肅王勞曰比在任
戰敵而已未足以盡副使才因復命之任君福在衢州
凡一十二年後遷湖州累職鎮海軍節度副使浙西行
營司馬奏授登州刺史保大保順等軍節度使檢校太
尉同平章事兼侍中天福五年卒年七十七贈開府儀
同三司謚忠壯君福有賜田在錢塘今所為鮑家田是
也

田近
玉泉

子脩讓別有傳

曹圭本歙州人父信知嘉興監事尋由歙徙杭為臨平

鎮將八都建時信因保嘉興東界遂家臨平焉圭之將
生也信夢一丈夫謂曰我當為爾子有二千石已而生
圭圭少負膽氣唐末事武肅王為嘉興都將淮南兵圍
嘉興圭與族人師魯環城固守淮人望氣者曰此雖孤
城中有貴人未可圖也是時戎馬充斥晝夜戒嚴圭日
與師魯登城樓張樂豪飲矢石交下處之晏如未幾圍
解圭以功超遷蘇州制置使天寶初淮南兵復圍姑蘇
會正月望夜圭及師魯等盛陳燒燈之席凡賊俘頌繫

者悉縱觀之以示從容已而圍亦解久之以浙西營田副使檢校太傅終于蘇州師魯形短而多智武肅王常稱曰今晏嬰也人因號為曹晏嬰竟居鎮而卒圭子仲達有傳

屠瓌智字寶光其先河東人晉將軍擊之後也祖某避地澗川遂為海鹽人母顧夢抱壁有光而生故名瓌智瓌智姿貌偉傑夙有勇畧更善屬文唐時累舉不第武肅王初起鄉兵逐黃巢瓌智仗劍相從數數以籌畫進

得叅莫府謀議董昌僭號瓌智首勸討賊昌誅以功授
指揮使乾寧四年同顧全武副王弟鎮自海道救嘉興
生擒賊將楊勝頓金等二十餘人計功遙領常州刺史
明年春再遷越州指揮使光化元年衢州刺史陳宓叛
瓌智又同全武等討平之三年調守湖州徐綰許再思
之亂也刺史高彥遣子渭與瓌智入援渭曰今日不利
彥曰赴君父之難何以吉辰為瓌智排案起曰違主命
不忠畏縮不前無勇死忠死勇丈夫分也僭渭直抵靈

隱山賊壘敵勢方張甚合圍數匝二人自朝至日晡轉
戰數里身創百處時或奮刀一呼手搏賊魁數人即馬
上办之矢盡援絕以空拳拒敵伏發竟同為所害時年
五十有二武肅王閔其忠俞以衣冠招魂而葬

墓碑云
墓開元

府海監縣南三十六里激川之
青山德政鄉歸仁里開化村

天寶五年特贈忠義軍

匡國功臣武康節度使銀青光祿大夫檢校尚書右僕
射開府儀同三司上柱國子龍驤激水鎮遏使昱

闕

節度使晟湖州判官

墓碑云環智娶錢氏子龍驤娶
聞人氏昱娶鄭良女晟娶許氏

智常有咏志詩曰輕身都是義狗主始為忠至是遂符

其識

丞相皮光業屠將軍墓誌銘曰河山毓瑞帶礪鍾英徒步奮跡赫聲濯靈么膺叛梗九首馮陵磨牙


王國吮血蒼生公怒颺發捷伐擊膺矢屠狻猊以身狗君功高盟府猷壯干城光啟前烈垂裕後昆忠孝續襲

勲土褒旌連崗崇寔安綏

義魂桓趙世選焜耀貞珉

論曰鄖國出入將相允文允武儋圭錫爵獲躋遐年非倖也君福善戰圭善守有古名將風瓌智奮不顧生卒以身狗至今猶稱忠烈不衰焉

十國春秋卷八十四



總校官庶吉士臣張能照

校對官檢討臣王鍾健

騰錄貢生臣蘇曰柄